

Tí tan jína chrónka ch'ín Mateo

*Tí sín k'uaxrjeníxin ch'ín Jesús
(Lc. 3.23-38)*

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham.

² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án.

³ Ch'ín Judá mé it'é tí ch'ín Fares la ko ch'ín Zara la tí ìné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram.

⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón.

⁵ Ch'ín Salmón mé it'é tí ch'ín Booz la ìné mé tjan Rahab. Ch'ín Booz mé it'é tí ch'ín Obed la ìné tí ch'ín Obed mé tjan Rut. Tí ch'ín Obed mé it'é tí ch'ín Isaí.

⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko ìné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa.

⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías.

⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías.

10 Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías.

11 Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjó sín tí yaon a ntá xrínahya ikui tí sín Babilonia sákjuíko sín tí sín israelita kixin ts'ejóchjina sín tí chjasén sín Babilonia.

12 Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel.

13 Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor.

14 Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud.

15 Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob.

16 Ch'ín Jacob mé it'é tí ch'ín José la ch'ín José mé k'óna xì tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

17 Mé xikaha catorce t'áchrjì k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrjì k'uaxrjeníxin tí ch'ín David la ntá tí sín Babilonia sákjuíko tí sín israelita chjasén sín la ntá í jnko catorce t'áchrjì k'uéjó la ntá kokjìhi Cristo.

Kokjìhi Jesucristo

(Lc. 2.1-7)

18 Tí kokjìhi Jesucristo mé xikihi kónhen. Tí tjan María iné ch'án mé tsotehe tjan ch'ín José. A ntá naxa kuákjahya kichó sín ntá kónoxín kixin jehe tjan

la ó tjejá tjan kíxin tíha la kjuachaxién Nchakuen Dios.

¹⁹ Ch'ín José mé tí nkexro ts'óna xì tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kíxin tjinkaon ch'án kíxin ninkexró tsoñoehya.

²⁰ Ntá tí naxa tjenkayáxin ch'án kíxin xikaha sich'e ch'án ntá kotáchrién ch'án chrónkaxín titàya k'uikuèn ch'án ikui ijnko ángel kuènte Ìnchéni nixja, chrónka kíxin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kíxin tí xjan tsochónta tjan la kjuachaxin kuènté Nchakuen Dios ikui mé k'óna tí xjan a.

²¹ Sinchekokjíhi tjan ijnko xjan ntoa la its'in xjan Jesús mé xikaha its'in xjan kíxin jehe xjan tsjakjìn ijje chojni —mé xikaha chrónka tí ch'ín ángel.

²² Kaín tíha kónhen kíxin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xikihi:

²³ Ijnko tjan naxa chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*
la tíha t'axrjéxín kíxin Dios tjejókoni. Mé xikaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uètoan tí ángel kuènte Ìnchéni la kuákja ch'án tjan María ts'óna ichjién ch'án.

* **1:23** Isaías 7.14

²⁵ A ntá kjónté xikaha la naxa kójnkojiéhya sín tí naxa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjíexín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uetuenhen ch'án tí nación a. A ntá xrínahya iso chojni ntoa kjuixín ijnko chjasin nó tjitoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé.

² Ntá kjuanchankí sín kixin:

—¿Nketí tjen tí xjan tsíkokjíhi ts'óna tí rey ts'etuenhen tí sín judío? K'uíkoxínni tí konotsé kuènte ch'án nó tjitoxín yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén.

⁴ Ntá tí ch'ín rey k'uetōan kixin síxrakoa kaín tí sín nchat'á t'etōan la kaín tí sín tjako tí ley la ntá kjuanchankíhi sín ch'án nketí chrókokjíexín tí nkexro Cristo.

⁵ Ntá jehe sín kjuátēhe sín kixin:

—Tsokjíexín xjan chjasin Belén estado Judea mé xikaha tsíkjin tí sín tsíchrónka itén Dios. Ntáchro xikihi:

⁶ Jaha chjasin Belén nonte Judá,

jaha la jehya ijnko chjasin imá ntsí;

kixin tí nonte ts'axrjexín tí nkexro antsí t'etōan,

la jehe ch'án ts'ayakonhen tí chjasin kuèntàna mé chjasin Israel.*

Mé xikaha nixja itén Dios.

⁷ Ntá imó k'uíyehē ch'in Herodes tí sín mago la kjuanchankíhi ch'án sín nkesá kjuankíxin k'uíkon sín tí konotsé.

⁸ Ntá chrónka sín ntá tuénxín k'uetōan ch'án kíxin sátsji sín chjasin Belén la ntáchro ch'án kíxin:

—Sátjirá ntiha la tjéyará tí xjan la tió ts'itjará xjan la tsochronkará kíxin ntá kjaxian janhan sátsjia ntiha tsotjahā xjan kjuasáya —mé xikaha k'uetōan ch'in Herodes.

⁹ Ntá kuínhin tí sín mago tí nkehe k'uetōan tí ch'in rey ntá sákjuí sín la xík'ikon sín tí konotsé inaá la kjuítaón va ntia la ntá chréhe sín hasta kjuák'e va chrítaón tí nchia tjen tí xjan a.

¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín.

¹¹ La k'uíxehen sín tí nchia la k'uíkon sín tí xjan kjuák'eko tí tjan María ìné xjan. Ntá k'uéjoxin toch'in sín la chjéhe sín kjuasáya ntá kuakitjehē sín tí nkehe kjuikāo sín la kjuanjon sín chica oro la ko ihnti tsochéxin chjincō la ko xroan xraxé náxrjón.

¹² Ntá chr'éxin kotáchrién sín chrónkaxín kíxin chrókjanhya sín tí tjen ch'in Herodes. Méxra kjanxin sín í jnko ntia la sákjuí sín chjasén sín.

Ch'in José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'in José chrónkaxín titàya k'uíkon ch'án ijnko ángel kuènte Ìnchéni chrónka kíxin:

* 2:6 Miqueas 5.2

—T'àyá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a.

¹⁵ Ntahó k'uéjó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchronka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyaha ch'án”.†

Ch'ín Herodes mé k'uetoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetoan ch'án kixin its'en kaín tí chánjan ntoa siín chjasin Belén ó chóna iyó nánó la ko tí xjan naxa chónahya iyó nánó. Mé xikaha k'uetoan ch'án kixin ó xraxinkaon ch'án nkehe kuínhin ch'án chrónka tí sín mago.

¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkama tjan xjeen tjan. Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

† 2:15 Oseas 11.1 ‡ 2:18 Jeremías 31.15

20 —T'àyá sátsjikoa tí xjan la ko tí ìné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uetōan tí ch'ín ángel.

21 Ntá ch'ín José mé k'uàya ch'án la sákjuíko ch'án tí xjan la ko tí ìné xjan la sákjuí sín chjasin Israel.

22 A ntá kuínhin ch'ín José kixin ch'ín Arquelao xjeen ch'ín Herodes mé k'uetōan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea.

23 Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uejó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje

(Mr. 1.1-8; Lc. 3.1-9, 15-17; Jn. 1.19-28)

1 A ntá tí yaon a kjuák'e ch'ín Juan Bautista nteje Judea la kjuako ch'án.

2 Ntáchro ch'án kixin:

—Tìtohéraá ijiáraá la tjínkírá tí nkehe tjenkayáxinrá kixin í séhya itsi kjuachaxién Dios.

3 Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuente tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Ìnchéni.

Takitjehéraá ijnko ntia ntoí.”*

* 3:3 Isaías 40.3

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje.

⁵ Itsjé chojni kuixín sín chjasin Jerusalén la ko í so chjasin siín estado Judea la ko chjinaxón tí ntarío Jordán kixin tsinhin sín nkexrí tjechrónka ch'án.

⁶ Ntá chrónka sín ijié sín ntá ch'ín Juan kuik̄itexín ch'án sín tí ntarío Jordán.

⁷ Ntá xrínahya k'uíkon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi?

⁸ T'ichjánxin kixin chrók'uejorá jnkójina chrókjuákoxinrá kixin chaxín kjuíttoxinhínrá tí nkehe tjenkayáxinrá.

⁹ Jahará nchehnerá ntáchrorá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham.

¹⁰ Tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche.

¹¹ Janhan mé inta tík̄itexián chojni kixin tsjakoxín sín kixin ó kjuíttoxinhin sín ntíé sín. A ntá tí nkexro itsi chr'éxin mé tsik̄itexínrá tí Nchakuen Dios la ko xrohi. Antsí tjetóxin t'etqan ch'án a ntá janhan la kánhyó. Méxra chrókósuàna sáchrókjuikian tokaté ch'án.

¹² Jehe ch'án la ó t̄jexraá ch'án pala sinchetjuáxin ch'án noatrigo kíxin tí ntachjiji trigo la ókjé ts'ejo ch'án a ntá tí noatrigo la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochŕixín —mé xikaha kjuako ch'ín Juan.

Kuíkite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixín ch'án nó estado Galilea ikui ch'án tí ntario Jordán tí t̄jen ch'ín Juan kixin ch'ín Juan tsikite tí jehe ch'án.

¹⁴ A ntá tí saoxín chrohya ch'ín Juan chrókuikite tí ch'ín Jesús ntáchro ch'án kíxin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kíxin jeheni chrókuikitia tí jaha —ichro ch'ín Juan.

¹⁵ Ntá kjuátehe ch'ín Jesús kíxin:

—A ntá jie la t̄itohé tí xikaha t̄jenkayáxian kíxin t'ichjánxín tsikiteni kíxin sinchexiteyáni tí nkehe k'uet̄oan Dios.

Ntá ch'ín Juan kuítekaon ch'án la xikaha kjuích'e ch'án.

¹⁶ Ntá tió kuikite tí ch'ín Jesús la ntá xrínahya titaya xitjehe nkajní la k'uikon ch'án tí Nchakuen Dios, éxi kontóá tsjehe, k'uínkajinxín nkaya nkajní ntá kjuák'e chrítaón kja ch'ín Jesús.

¹⁷ Ntá xrínahya kuínhin sín ijnko tan kuixín nkaya nkajní ntáchro kíxin:

—Tíhi mé xjanna la imá t̄juaha ch'án la imá chàna kíxin nchexiteyàna ch'án.

4

*Ch'ín Tsochren chrókjuachroe ch'ín Jesús**(Mr. 1.12-13; Lc. 4.1-13)*

¹ Ntá tí Nchakuen Dios mé sákjuiko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús.

² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta.

³ Ntá ch'ín Tsochren mé kóchjinehe tí ch'ín Jesús kixin tjinkaon chrókjuachaxin ch'án. Ntáchro ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ Ntá kjuátehe ch'ín Jesús ntáchro kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja ninko a

⁶ la ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen†

—ichro ch'ín Tsochren.

⁷ Ntá kjuátehe ch'ín Jesús ntáchro ch'án kixin:

* 4:4 Deuteronomio 8.3 † 4:6 Salmo 91.11-12

—Náhi. Kjaxin ntáchro xroon itén Dios kixin: “Chjinihya chrókjuásixián kjuaxroan kjuachaxin kuènte Ìnchéni Dios”‡ —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín xín tí nacióon siín chjasintajni la ko tí nkehe t'etoan kuènte.

⁹ La ntáchro ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰ Ntá kjuátehe ch'ín Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuikosáyehé Ìnchéni Dios la jehó ch'án chrókjuich'ehé xra”§ —ichro ch'ín Jesús.

¹¹ A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankixin ch'án tí xra kuènte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntoechiso a, a ntá jehe ch'án mé sákjuí ch'án estado Galilea.

¹³ Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabolón la ko estado Neftalí.

¹⁴ Mé xikaha kjuích'e ch'án kixin tsoxiteyá tí nkehe tsíkjin ch'ín Isaías, ijnko nkexro k'uéchrónka itén Dios. Ntáchro ch'án kixin:

¹⁵ Tí estado Zabolón la ko Neftalí tí ntia

‡ 4:7 Deuteronomio 6.16 § 4:10 Deuteronomio 6.13

chr̄inta ntayaon la tí nó chók'á tjitoxin yaon tí
ntarío Jordán,

mé tí estado Galilea tí tjejó tí sín jehya judío.

¹⁶ Mé ntiha tjejó tí sín síin tí sítié mé ts'ikon sín ijnko
xrohi jíé,

la tí sín éxí tsík'en xritjejó sín

mé ts'inkaséyanxín ts'ejó sín.

¹⁷ Ntá kjuankixin kjuako ch'ín Jesús ntáchro
ch'án kixin:

—Tjitóxínhinrá ntíará. Tsákjára ijnko ntia nixin
kixin kjuachaxin kuènte Dios tjen nkaya nkajní la
í séhya tsi.

Ch'ín Jesús k'uíyehé noó chojni k'uétsé koche
(Mr. 1.16-20; Lc. 5.1-11)

¹⁸ Ntá sákjuí ch'ín Jesús chr̄inta ntayaon Galilea
ntá xrínahya k'uíkon ch'án yaá sín jnkokoá kichó
sín, ijnko mé it'in Simón mé kjaxin it'in ch'án Pedro
la ko í jnko it'in Andrés. Jehé sín mé koche xritsé
sín. Ntá tinkák'e sín nchísén chr̄inkí ntá.

¹⁹ Ntá ch'ín Jesús nixjehé sín ntáchro ch'án kixin:

—Chréhérá tí janhan ntá tsotjahará xr̄á tsjéyará
chojni.

²⁰ Ntá tuénxín kuítóhe sín tí nchísén k'uétséya sín
koche, ntá sákjuíko sín ch'án.

²¹ Ntá kjínhya kjuíji ch'án ntá k'uíkon ch'án ijnko
yaá sín, jnkokoá kichó sín, mé tí ch'ín Jacobo la ko
ch'ín Juan, mé xjeen tí ch'ín Zebedeo. Tjejóko sín
it'é sín tí ntabárc̄o la tjejótjonite sín tí nchísén tséya
sín koche. Ntá kjaxin tí sín a k'uíyehé ch'ín Jesús.

²² La ntá tuénxín kuítóhe sín tí ntabárc̄o la ko tí
it'é sín ntá sákjuíchréhé sín tí ch'ín Jesús.

*Kjuakohe ch'ín Jesús nchónhya chojni
(Lc. 6.17-19)*

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí nínko Israel síin jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitohe ch'án jína kaín chojni chóna kaín xín chin la ko kaín kjuatjoté.

²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuikao sín kaín xín tí sín níhi chóna kaín chin la ko tí sín imá tjotéhe sín la ko tí sín chóna nchakuen tí jínahya la ko tí sín t'aniáte sín la ko tí sín síxénká toté sín, la ntá ch'ín Jesús mé kjuínchekitohe ch'án sín jína.

²⁵ Ntá itsjé chojni kjuíchréhe tí ch'ín Jesús, mé kjuixin sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarío Jordán.

5

Kjuakoxin ch'ín Jesús ijnko jna

¹ K'uíkon ch'ín Jesús kixin k'uéjó nchónhya chojni la ntá chrin ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án.

² Ntá ch'ín Jesús kjuankixin kjuakohe ch'án sín kixin:

*Tí nkexro tjejó náxrjón
(Lc. 6.20-23)*

3 —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehe sín mé tsochón̄ta sín tí kjuachaxin kuènte Dios.

4 'Náxrjón tjejó tí sín t'ává kixin Dios mé sinchechéhe asén sín.

5 'Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

6 'Náxrjón tjejó tí sín éxí yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

7 'Náxrjón tjejó tí sín tikonóehē kichó sín kixin ntá Dios kjaxin tsikonóehē tí jehe sín.

8 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

9 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

10 'Náxrjón tjejó tí sín kjónté tjejó́tjasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

11 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan.

12 Chrókócháhará la ko kjuaxróxin chrók'uejórá kixin ntá chr'éxin jahará ts'ayéhérá ijnko nkehe antsí má jína nkaya nkajní. Mé xikaha kjuasóte tí sín k'uéjó ósé k'uéchrónka sín tí itén Dios.

Jahará la éxí yóhe xijnta la ko éxí xrohi t'inkaséyanxín chjasintajni

(Mr. 9.50; Lc. 14.34-35)

13 'Jahará mé yóhe éxí xijnta chjasintajni. A ntá tí chrók'uánkéhé tí jní tí xijnta la ntá xitjahya

chrókójní ínaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá.

¹⁵ La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro síin tí nchia ntiha.

¹⁶ Mé xikaha tí jahará chrókóyóhará éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'éni tjen nkaya nkajní.

Kjuako ch'ín Jesús kuènte tí ley

¹⁷ Jahará chróntáchrohyará kixin k'uinka kixin tsjakjíyan tí ley tsík'etóan ch'ín Moisés la ko tí nkehe kjuako tí sín k'uéchrónka itén Dios. Náhí. Jehya xikaha k'uinka kixin tsjakjíyan tíha. Náhí. K'uinka janhan kixin tsjákoxian nkehe chaxín t'axrjexín tíha.

¹⁸ Chaxín xrjanka kixin tí naxa tjen nkajní la ko chjasintajni la kohya ninkehó ley tsjìinhya, mé tsjìinhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxín tsoxiteyá.

¹⁹ Mé xikaha tí nkexro tsitekakonhya tí nkehe k'uetoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohe ókjé nkexro tsitekaon sín, mé antsí imá ts'etóan sín tí tsi kjuachaxin kuènte Dios.

20 Méxra tjonkará kixin t'ichjánxin kixin antsí jina ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjará tí kjuachaxin kuènte Dios tjen nkaya nkajní.

*Kjuako ch'ín Jesús kuènte tí kjuanínkaon
(Lc. 12.57-59)*

21 'Jahará tsíkinhínrá kixin tí sín ósé tsík'ítuenhen sín kixin: “T'oyánhyará kíchuará* kixin tí nkexro t'óyán kichó mé t'ichjánxin tsjasóte sín.”

22 A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhin kichó la mé tí sín t'etōan mé sinchekitoexín ijíé ch'án. La ntá tí nkexro tson táche kichó kixin tsíxénká ch'án la tíha mé sátsji tsjasótexín tí síin xrohi.

23 A ntá tí tsjikueherá Dios nkehe tsochjehérá ch'án ntá tsjasánrá tí altar ntá tsoxráxinkáonrá tí jnkojín kíchuará kjuanjonkoará sín

24 la ntá tí xíkaha la tìtoherá tí nkehe tí altar la sátsjirá tsonixjehérá ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

25 'Tí síin jnkojín nkexro tjanchia jie tí jahará la tjinkaon chrókjuikoará ch'án juzgado, a ntá íchá jina jnkokoá chrókjuenkayáxinrá, jehe ch'án la ko jahará, ntia ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntoechiso.

* 5:21 Éxodo 20.13; Deuteronomio 5.17

26 **A** ntá chaxín tjonkará kixin tí ts'ikjahará sín ntóechiso la ts'axrjéxinhýará ntiha tsjixinjian tsjenkeherá sín kaín xín chichaon chontará.

Ch'ín Jesús kjuako kixin chrókjuasinhya sín jie, chróchóntahya sín chojni chjin ókjé

27 'Jahará tsíkinhínrá tí nkehe tsík'ítuenhen tí sín ósé ntáchro kixin: “Chrókjuásinhýará jie, chróchóntahýará chojni chjin ókjé.”†

28 **A** ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

29 '**A** ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'ó cuerpo kuéntá kixin jehya kuénté cuerpo kuéntá sátsji tsjasótexín tí siín xrohi.

30 **A** ntá tí itja chjina chrókjuásixián jie la chrókóchrínjian tí tjá a la chróchr'an ikjín kixin íchá jína ts'ítjáyán it'ó cuerpo kuéntá kixin jehya kuénté cuerpo sáchrókjui tsjasóte tí siín xrohi.

Ch'ín Jesús kjuako kixin chrók'uitjéhya kichó sín (Mt. 19.9; Mr. 10.11-12; Lc. 16.18)

31 'Kjāxin tsík'ítuenhen tí sín ósé kixin tí nkexro tjinkaon chrók'uitjíhi ichjién t'ichjánxin ts'óna xroon tsakja tí ichjién kixin ts'ítjéxín kichó sín.‡

32 **A** ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jie. **A** ntá tí nkexro tsotehe ijnko tjan tsíkítsínkehe la kjāxin ó kjuasin ch'án jie.

† 5:27 Éxodo 20.14; Deuteronomio 23.21 ‡ 5:31 Deuteronomio 24.1-4

*Ch'in Jesús kjuako kixin chjiníhya
chrók'uákjenxinni ihnié Dios*

³³ 'Kjaxin tsíkinhínrá tsík'ítuenhen tí sín ósé kixin: “T'ichjánxin sìnchexiteyará tí nkehe tsintáchrórá kixin chrók'uákjenxinyhará ihnié Ìnchéni chjini.”§

³⁴ A ntá janhan mé tjonkará kixin chrók'uákjenxinyhará ihnié Dios ninkehó la ko chrók'uákjenxinyhará nkajní kixin ntaha tjen Dios t'etoan.

³⁵ La ko chrók'uákjenxinyhará chjasintajni kixin ntaha tjejókjen toté ch'án la ko chrók'uákjenxinyhará chjasin Jerusalén kixin ntiha la itjen tí Rey t'etoan.

³⁶ La tjenkayáxixinyhará ikjára ó kixin jahará xitjahya tsjakérá ijnko kaxihi tjóá o nijnko kaxihi tié.

³⁷ Tí nkehe tsontáchrórá chaxín la chaxín la tí nkehe náhi la náhi la kohya nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

*Ch'in Jesús tjako ch'án kuènte tí sín t'itjáenyha
ichrén kjuanínkaon*

(Lc. 6.29-30)

³⁸ 'Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírá ikon sín. A ntá tí chrókuakitsjenkí sín nènorá la kjaxinrá chrókuakitsjenkírá neno sín kjaxin.*

§ 5:33 Números 30.2; Deuteronomio 23.21 * 5:38 Éxodo 21.24; Levítico 24.20; Deuteronomio 19.21

39 **A** ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xikaha. Náhí. Tí chjéhe ijnko nkexro ijnko tuāan la ntá tjóka tí í jnko nānko tuāan.

40 La tí siín jnkojín nkexro tjanchia jie la tjinkaon sín chrókuakitsjaha sín camisá la t̄tohé sín sátsjiko sín tí ka t'ínkayate kjaxin.

41 La tí t'etuānhanrá sín tsámará nkehe ijnko kilómetro la tjakét'oxinrá í yaá kilómetro.

42 Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin “náhí”, chrókjuinchejnenrá ch'án.

Tjuèhérá tí sín nínkakonhanrá sín

(Lc. 6.27-28, 32-36)

43 'Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsoninkákonhénrá tí sín jínahya kjuít'ahará.” †

44 **A** ntá janhan mé tjonkará kixin chrótjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya.

45 Tí xikaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoan ch'án tsjiton yaon ts'inkaséyenhen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí siín tí sín jína la ko tí sín jínahya.

46 Tí jehó tjuèhérá tí nkexro tjuàhará, ¿la ntá nkehe chrókjuachará? **A** ntá kjaxin tí sín nchekjènkj la xikaha ch'e sín.

† 5:43 Levítico 19.18

⁴⁷ La tí jehó nixjehérá tí sín kíchuará la ntá, ¿á chaxín imá jína tíha ní? Kíxin tí xíkaha la kjaxin tí sín chónhya Dios la xíkaha ich'e sín.

⁴⁸ Kjaxinrá jahará ntoá chrók'uejorá kixin It'eni tjen nkaya nkajni la antsí má ntoá tjen ch'án.

6

Kjuako ch'in Jesús kuèté tí xra jína

¹ 'Chrókjuásixínhyará kjuaxroan tí nkehe tin-kachónkirá kixin tjínkáonrá chrók'uikon chojni ó. A ntá jahará tí xíkaha chrókjuich'erá ntá It'eni tjen nkaya nkajni la ninkehó nkehe tsotjáhyará ch'án.

² Tí tjínkĩtsará ijnko chojni nòa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xíkaha ch'e sín t'óxroan sín nkaxenhen njnko la ko tí ntja kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyèhya sín inaá.

³ A ntá tí jahará tió chrókjuínkĩtsará ijnko chojni chaxín nòa la íchá jína kixin chrókónoehya ninkexró kjónté ijnko nkexro tjuá jína.

⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xíkaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjeheni Dios (Lc. 11.2-4)

⁵ 'A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen

n̄inko la ko ts'ejó sín esquina calle kuènte n̄tasin k̄ixin ts'ikon kaín chojni k̄ixin tjejónixjehe sín Dios. Ntá janhan chaxín ntáxrjan k̄ixin jehe sín la x̄ikaha kjuích'e sín la ó kjuixin k'uáyéhe sín nkehe la í ts'áyèhya sín ínaá.

⁶ A ntá tió nixjehérá Dios la t'ixenhénrá nchia ntoará la t'ikjehérá tí puerta la nixjehérá It'eni k̄ixin ntaha tjekoará ch'án. A ntá jehe ch'án ts'ikon k̄ixin x̄ikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjateehya chrónixjará k̄ixin chrókóyóahyará éxí tí sín chónhya Dios k̄ixin jehe sín tjenkayáxin sín k̄ixin nchónhya tsonixja sín, la mé x̄ikaha mé chrókuinhin Dios, ichro sín.

⁸ A ntá jahará chrókóyóahyará éxí tí jehe sín. It'eni ó nohe ch'án nkehe t'ichjánxinhánrá kjónté naxa tjanchéhyará ch'án.

⁹ Méxra x̄ikihi chróntáchrora:
It'eni tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuích'e tí nkehe tóxrjínhan jaha ntihi chjasintajni éxí tjech'e nkaya nkajní.

¹¹ Ijie la tsjánjuan tí niotja t'ichjánxinhinni.

¹² T'oxíka tí nkehe jínahya kjuích'eni k̄ixin kjaxin jeheni ts'itjáyenhenni tí nkehe kjuích'eheni chojni.

¹³ T̄itoéhyani k̄ixin xrahya chrókjuasinni jie. Nchekaáni kaín tí jínahya chrókónhenni, k̄ixin jaha mé kuèntá tí kjuachaxin k̄ixin ó noheni k̄ixin jaha tjetétoan tí kjuachaxin jnkochrín. Amén.

14 'Tí jahará ts'itjáyanhanrá tí nkexro kjuasinhanrá ichrén jiē la mé kjaxin It'éni tjen nkaya nkajní mé ts'ikon ch'án kixin xikaha kjuich'erá la ntá kjaxin jehe ch'án ts'óxíka ch'án tí jiē kjuásinrá.

15 A ntá tí jahará ts'itjáyanhyará tí jiē kjuasinhánrá í jnko chojni la ntá kjaxin It'éni tjen nkaya nkajní ts'ikon kixin xikaha kjuich'erá k'uitjáyanhyará la ntá kjaxin jehe ch'án la ts'óxíkahya ch'án tí jiē chontará.

Ch'ín Jesús kjuako kixin chrók'óxroanhya sín kixin kjónehya sín

16 'A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín ínaá.

17 A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoará kjará

18 kixin tsonoehya chojni kixin naxa kjóntehyará. Jehó It'éni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

*Tí nkehe chaxín tjete sín nkaya nkajní
(Lc. 12.33-34)*

19 'Jahará chrókjuásitonhyará nkehe tjete ntihi chjasintajni kixin ntihi la ts'ín kué tí nkehe tjete sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará.

20 Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáyan nkehe

la tsochjisenhya tí nkehe la ko kohya xíchee ts'ixenhen tseeé.

²¹ A ntá tí nkaya nkajní tsochontará nkehe tjeté la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² 'Tí ikonrá mé éxí yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuénté ti cuerpo kuéntará mé chóna xrohi.

²³ A ntá tí ikonrá la jínahya la ntá kuénté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ 'Kohya ninkexró tsjacha sich'ehe xra yaá lamó. Tí xíkaha chrókjuich'e ch'án la ntá ijnko tsonínkakohen ch'án la tí í jnko tsotjuèhe ch'án o ijnko la tsitekakohen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ 'A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uítsará?

²⁶ Xráxinkáonrá nkexrí siín tí koxroxé xritjaka. Jehé va la t'enkahya va noa la ko tjáhya va la ko

chóntahya va nketí ts'inkachjinayá va tí noa, la kjánchó It'éni tjen nkaya nkajní la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó.

27 ¿Á tjejó jnkójínrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

28 '¿Nkekuènté kixin imá tóxakonhanrá ikará ó? Tsjehérá nkexrí sít'ánkí tí catsjo síin nteje. Tí itsjo la ní ch'ehya xra la ko tjonhya.

29 La tjonkará kixin kjónté ch'ín rey Salomón k'uéchónta itsjé chichaon la naxa kjuíncheyóehya ch'án nkexrí náxrjón tsjehe tí tsjo a.

30 A ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté títekákonhyará ch'án?

31 Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uítsará.

32 Kaín tí nkehe la tí sín chónhya Dios mé tóxakonhen sín tíha. A ntá jahará chontará It'éni tjen nkaya nkajní la mé nohe ch'án kaín nkehe t'ichjánxinhanrá.

33 A ntá senó mé chrókjuéyará tí kjuachaxin kuènté Dios la chrókjuínchexiteyará tí nkehe jina tjinkaon ch'án, a ntá jehe ch'án mé tsjanjon ch'án kaín nkehe t'ichjánxinhanrá.

34 Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkójnko yaon tjikao kjuaxikaon kuènte.

7

Chrók'uantaxíenhyará kíchuára
(Lc. 6.37-38, 41-42)

¹ 'Chrókuékahyará ókjé chojni jię kixin ntá Dios kjaxin chrókuanchahya jię tí jahará.

² A ntá Dios la tsjanchia ch'án jię tí jahará tí tsékará ókjé chojni jię. A ntá tí xíkaha sích'erá la mé xíkaha tsonhanrá kjaxin.

³ ¿A ntá nkekuènte tsjehé tí chjinínó ntsí tjenkánkí ikon tí kichuá tí naxa ántosán tí inta jié tjenkánkí ikuan?

⁴ A ntá tí chonta jaha tí nta jié tjenkánkí ikuan, ¿a ntá nkexrí kixin chróntáche tí kichuá kixin: "Títóhé tsakitsjenkíni tí chjinínó ntsí tjenkánkí tí kuan?"

⁵ A ntá jaha la ntoáhya tjenkayáxian. Senó chrókuakitsjenkiá tí nta jié tjenkánkí ikuan kixin ntá chrók'uikuan tsakitsjenkiá chjinínó ntsí tjenkánkí ikon tí kichuá.

⁶ 'Chróchjeéhyará tí nkehe tsíkótjóá tí konja kixin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

Tjanchia la tjéyá la t'inka puerta
(Lc. 11.9-13; 6.31)

⁷ 'Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe.

⁸ Kíxin tí nkexro tjanchia nkehe la ts'áyéhe tí nkehe la tí nkexro tjeyá nkehe la ts'itja la tí nkexro t'inka puerta la tsoxitjehe.

⁹ ¿Á tjejó jnkojín nkexro ntihi chrókjuanjjon xro chrókjóne xjeen tí chrókjuanchia xjan niotja? Kja náhí.

¹⁰ Q tí chrókjuanchia xjan ijnko koche la, ¿á chróchjéhe ch'án tí xjeen ch'án konche chrókjóne ní? Kja náhí.

¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'éni tjen nkaya nkajní kjaxin antsí tsochjéhe ch'án nkehe jína tí nkexro tsjanchia nkehe.

¹² Méxra xikaha chrókjuíkosáyehérá kichuárá éxí yóhe nkexrí tjinkáonrá chrókjuikosáyahará sín mé xikaha k'uetóan ch'ín Moisés la ko xikaha ntáchro tí xroon kuente tí sín k'uéchrónka itén Dios ósé.

Tí puerta tekahya
(Lc. 13.24)

¹³ T'ixeenxínrá tí puerta tekahya. Kíxin tí puerta la ko tí ntja ts'itjáyanxín chojni la imá iton la ko teka la nchónhya chojni sátsji tí ntja ntiha.

¹⁴ A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsoanxínni tí nta
(Lc. 6.43-44)

¹⁵ Méxra tóxakonhanrá tí ts'ikonrá itsi tí sín ch'ia tsontáchro sín kíxin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe.

¹⁶ Jahará la chrókjuátsoanxínrá tí jehe sín kíxin tí xra ch'e sín kíxin tí ntach'i la xitjahya chrók'óna to uva la ko tí kach'i xitjahya chrók'óna to higo.

17 Méxra kaín inta jína la t'óna to jína la ntá tí nta jínahya la kjaxin tí to la jehya to jína.

18 Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína.

19 Kaínxín tí nta t'ónahya to jína mé tsochrínjin la tsoche.

20 Mé xikaha chrókjuatsoanxínra jahará tí sín jehya jína kixin tí xra tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní

(Lc. 13.25-27)

21 'Kénhya chojni tsontácho: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínhin T'aná t'etōan tjen nkaya nkajní.

22 Tsjixraká tí yaon a la ntá itsjé sín tsontácho sín kixin: “Ìnchéni, Ìnchéni, k'uénixjaxínni ihniá la ko tí ihniá mé kuakitsjexínni nchakuen tí jínahya la ko kjuachaxién ihniá kjuasixínni nchónhya kjuaxroan.”

23 A ntá janhan tsjataha kixin: “Janhan la chonhya tí jahará. Titonará sátjirá kixin jahará imá jínahyará.”

Ch'ín Jesús kjuíncheyóexin ch'án kixin yaá nchia

(Lc. 6.47-49; Mr. 1.22)

24 'Méxra tí nkexro tinhin tí nkehe ntáxrjan la titekaon ch'án la jehe ch'án mé éxí yóhe ijnko nkexro chóna kjuaxrexinkaon jína la kjuích'éna nchia chritaón tjo.

25 A ntá xrínahya xrakoa chrin, ikui yeé ntaninche la tjian chjéhe xrinto la kjónté xikaha la xikahya tí nchia kixin itjo tjekjen nchia.

²⁶ A ntá tí nkexro tinhin tí xrjanka la titekakon-hya mé jehe la éxí yóhē ijnko nkexro lontí la kjuích'éna ch'án ijnko nchia tí síin nchesen.

²⁷ La ntá xrinahya xrakoa chrin ntá antsí kóyeé ntaninche tí tsaka la ko chjéhe xrinto la ntá xíka tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kíxin nkexrí kjuako ch'án.

²⁹ Kíxin kjuako ch'án éxí ijnko nkexro chóna imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekitohe jína ijnko chojni chóna chin lepra

(Mr. 1.40-45; Lc. 5.12-16)

¹ A ntá ch'ín Jesús k'uínkajinxin ch'án tí jna la chréhe nchónhya chojni.

² La ntá kóchjina ijnko ch'ín níhi chóna chin lepra la kjuák'exín toch'in ch'án nkayakon ch'ín Jesús la ntáchro ch'án kíxin:

— Ìnchéni tí tjinkávan la jína chrókjuínchekitohéni jína — ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kíxin:

— Méxra xíkaha tjínkavan. Ntá jie sintakitoha jína.

A ntá tuénxín kuítóhe ch'án jína la ó kjuiin tí chin k'uéchóna ch'án.

⁴ La ntá ntáchro ch'ín Jesús kíxin:

— Ninkexró chenkahya ntihi. Jehó sátjia tjákohé tí ch'ín nchát'á kíxin kuítóha jína la ko sátjkoa tí

nkehe tsík'etōan ch'ín Moisés* ḱixin ntá xíkaha tsonoexín kaín xín chojni ḱixin ó kuítóha jína —mé xíkaha k'uetōan ch'ín Jesús.

Ch'ín Jesús kjuínchekitohe jína ijnko nkexro ch'ehe xra ijnko capitán romano

(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chrónòa ch'án

⁶ ntáchro ch'án ḱixin:

—Ìnchéni ntōeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjotéhe ch'án —ichro ch'án.

⁷ A ntá ch'ín Jesús kjuátehe ch'án ntáchro ch'án ḱixin:

—¿Á sátsjia sintakitoḥa jína tí ch'ín a? —ichro ch'án.

⁸ Ntá tí ch'ín capitán kjuátehe ḱixin:

—Náhí, Ìnchéni, tósuèheni ḱixin chrók'uixenhen ntōeni ḱixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'ehe ni xra chrókuitohe ch'án jína.

⁹ Janhan na kjaxin chonta chojni t'etuanna la ko kjaxin janhan tétuanhan tí sín soldado. Tió tétuanhan ijnko sín sátsji sín la ntá ó sátsji sín. La kjaxin tió tétuanhan ijnko sín ḱixin xrakoa sín la mé tji sín. La ko tió tétuanhan ijnko nkexro ch'ena xra ḱixin sich'e xra la ich'e xra —ichro ch'án.

¹⁰ Ntá kuínhin ch'ín Jesús ntá kóxakonhen ch'án ḱixin xíkaha chro tí ch'ín a, ntá nixjehe ch'án tí sín chréhe ch'án ntáchro ch'án ḱixin:

* 8:4 Levítico 14.1-32

—Chaxín ntáxrjan kixin kuenté tí nación Israel la k'uitjahya janhan ninkexró tinkáchónki xikaha éxi tinkáchónki tí ch'ín i.

¹¹ Janhan xrjanka kixin nchónhya chojni ókjé tjixin tí tjitoxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuènte Dios.

¹² A ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sátjia ntōa. Éxi kuítekávan jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

*Ch'ín Jesús kjuínchekitohe ich'ee ch'ín Pedro jína
(Mr. 1.29-31; Lc. 4.38-39)*

¹⁴ A ntá sákjuí ch'ín Jesús tí ntōe ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa.

¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankíxin yaxínhin tjan kixin tsjanjon tjan nkehe sine sín.

*Ch'ín Jesús kjuínchekitohe nchónhya tí sín níhi jína
(Mr. 1.32-34; Lc. 4.40-41)*

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjexín tí nchakuen tí jínahya tí jehe sín la kjaxin kjuínchekitohe ch'án jína kaín tí sinníhi.

17 Mé xikaha kjuích'e ch'án kixin tsoxiteyá tí nkehe tsíchronka tí ch'ín Isaías tí ch'ín k'uéchrónka itén Dios. Mé ntáchro ch'án xikihi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xikaha ichro itén Dios.

*Tí sín tjinkaon tsochréhe tí ch'ín Jesús
(Lc. 9.57-62)*

18 Tió k'uíkon ch'ín Jesús kixin nchónhya chojni k'uántatjen sín ch'án la ntá k'uetqan ch'án kixin ts'átòye sín í jnko chrínta ntá.

19 La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

20 La ntá kjuátehe ch'ín Jesús ntáchro ch'án kixin:

—Tí koxróntá chóna va itjueé va la ko tí koxroxé chóna va kaké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

21 A ntá ijnko tí chojni k'uájiko ch'án, mé ntáchro ch'án kixin:

—Inchéni, títòhéni senó sátsjikjaváni it'èni —ichro ch'án.

22 La ntá kjuátehe ch'ín Jesús ntáchro ch'án kixin:

—Náhi, chréhe tí janhan. Títòhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

*Ch'ín Jesús kjuínchek'ixrata tí xrínto la ko tí ntá
(Mr. 4.35-41; Lc. 8.22-25)*

23 Ntá ch'ín Jesús k'uíxenhén tí ntabárcq la k'uíxenko ch'án tí sín k'uájiko ch'án.

† 8:17 Isaías 53.4

24 La ntá xrínahya imá síchrica ntá la ó chjina sítikia ntá tí ntabárcō. La kjánchó ch'ín Jesús la tjejua ch'án.

25 La ntá tí sín k'uájiko ch'án kjuínchek'àya sín ch'án la ntáchro sín kixin:

—Ìnchéni nchekaáni kixin tí ntabárcō la ó meró ts'aniánkí ntá —ichro sín.

26 Ntá kjuátēhe ch'án ntáchro ch'án kixin:

—¿Nkekuèté kixin imá chrakonrá? Intsíkoá tin-kachónkirá Dios —ichro ch'án.

Kjuixin ntáchro ch'án xíkaha ntá k'uàya ch'án la k'uetuēnhen ch'án tí xríntō la ko tí ntayaon la ntá tuéxín k'uixrata.

27 La ntá imá chrakon sín la ntáchro sín kixin:

—¿Xá nkexro tíhi? Kjónté xríntō la ko ntayaon la mé nchexiteyéhe ch'án —ichro sín.

*Tí sín chóna nchakuen tí jínahya tí nonte Gadara
(Mr. 5.1-20; Lc. 8.26-39)*

28 Ntá tió k'uátòyē ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tòyé chojni tsík'en la kóchjinehe sín ch'án. Jehé sín mé imá jiehe sín la kohya ninkexró tjacha ts'atsínka tí ntja ntiha.

29 La ntá kjuankixin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin sìnchekjasóteni kjónte naxa kjuixrakáhya tí yaon tsjasóteni? —ichro sín.

30 A ntá ntiha kánhyó kjín síin itsjé cochíno xrine va.

31 La ntá tí nchakuen tí jínahya mé chrónóēhe tí ch'ín Jesús kixin:

—Tí tsétoan kixin sátsjini la chrókuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sátjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxín va ntiha kjuítsínkayá va tsaka, ntá kjuítsínkankí va ntá, kjuínhin va ntá.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchónta tí nchakuen tí jínahya.

³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóhe sín ch'án kixin sáchrókjui ch'án ókjé.

9

Ch'ín Jesús kjuínchekitohe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uixenhen ch'án ijnko ntabarco la k'uátsínka ch'án í jnko lado chrínta ntá la kjuíji ch'án chjasén ch'án.

² A ntá ntiha kuikao sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tinkáchónki sín ch'án la ntá nixjehe ch'án tí sinníhi ntáchro ch'án kixin:

—Xjeenni nchechéhé asán. Tí jie chonta la ó kjuixin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kixin:

—Tí ch'ín i mé ncheyóhē ch'án asén ch'án Dios kixin xikaha nixja ch'án.

⁴ Ntá ch'ín Jesús mé ó nohe ch'án kixin nkehe tí kjo sín asén sín ntá ntáchro ch'án kixin:

—¿Nkekuènté kixin xikaha jínahya tjenkayáxinrá?

⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuìnhin ch'án tí jiē yámá ch'án o á antsí xrahya chróntátjan ch'án kixin chrók'uínkatjen ch'án sáchrókjuí ch'án?

⁶ Méxrā tsjákoxiān kixin tí Xjeen Dios K'óna Chojni mé ntihi chjasintajni chóna kjuachaxin tsjakjìnhin ijíe chojni.

Ntá ntáche ch'án tí sijníhi a kixin:

—Ijje la t'inkatjen tjatsíyan kaniāa na sátsjia ntoa —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntoe ch'án.

⁸ Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuakoxin ch'án kjuachaxin kuènte Dios.

*Ch'ín Jesús k'uíyehē ch'án tí ch'ín Mateo
(Mr. 2.13-17; Lc. 5.27-32)*

⁹ A ntá ch'ín Jesús sákjuixin ch'án ntiha la k'uíkon ch'án ijnko ch'ín it'in Mateo tjetjaxin ch'án ntiha nchekjènkj ch'án. Ntá ntáchro ch'ín Jesús kixin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhē ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntɔɛ tí ch'ín Mateo la ntaha xranjon nkehe sine ch'án la ntá itsjé tí sín nchekjènkɪ la ko í so sín chónɔta jìɛ mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án.

¹¹ La ntá tí sín fariseo kjaxin k'uúkon sín xikaha la kjuanchankíhi sín tí sín k'uájiko ch'ín Jesús, ntáchro sín kixin:

—¿Nkekuènté kixin tí ch'ín maestro kuèntará mé neko ch'án tí sín nchekjènkɪ la ko tí í so sín chónɔta jìɛ? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kixin:

—Tí sín níehya la t'ichjánxienhya sín nkexro sich'e xroan. Náhí. Jehó tí chojni níhi mé t'ichjánxinhin sín nkexro sich'ehe sín xroan.

¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan tjínkavan kixin chrókuikonóehérá chojni la tjínkakonhya kixin chrók'oyánrá iko chrókjuánjonrá.”* Mé xikaha ichro itén Dios. Janhan na k'uinkahya ntíhi kixin chrók'uíyaha chojni jína tjejó. Náhí. K'uinka kixin ts'íyaha tí chojni chónɔta jìɛ kixin chrókuítóhe sín tí ijìé sín ntá chrókjuinkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

* **9:13** Oseas 6.6

—Jeheni la ko tí sín fariseo la jnkoyaxon nehyani, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátēhe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyēhe sín tsochjina tsotēhe ijnko chojni kixin naxa tjen tí ch'ín tsíkótēhe tjejóko sín ntiha? A ntá tsjixraká ijnko yaon tsotsé sín tí ch'ín tsíkótēhe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ 'Nijnko chojni chrókjuak'eniēhe tí ka óntaxin it'o ka nixin kixin ntá chrókjuixéhe tí ka nixin chrók'uitjjan tí kantaxin ntá antsí má chrók'uichje.

¹⁷ La ko kjaxin éxí yóhe chrókuikiahya chojni xranvino nixin ijnko tjuaxran óntaxin kixin tí xikaha chrókjuich'e sín ntá chrók'uichje ti tjuaxranntaxin. Ntá chrók'uitjayan tí xran la ko chrok'uitjayan tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjanyan.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jína ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etōan kuènte tí sín judío la kjuák'exín toch'in ch'án nkayakon tí ch'ín Jesús la chrónōēhe ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

19 Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án.

20 A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án

21 kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítóexín tjan jína.

22 Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jína kixin kuítekávan tí janhan —ichro ch'án.

Na ntá tuénxín ó kuítóhe tjan jína.

23 Ntá tió kjuíji ch'ín Jesús ntoe tí ch'ín judío t'etóan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkàma sín xjan.

24 La ntá ntáchro ch'ín Jesús kixin:

—Tí xjan méhe títóhéra, kixin tsík'enhya xjan, la tjejua xjan ó —ichro ch'an.

Ntá kjuanoá sín ch'án.

25 A ntá tí k'uaxrje kaín chojni la ntá ch'ín Jesús la k'uíxenhén ch'án la itsé ch'án itja tí tjan a la ntá tuénxín k'uínkatjen tjan.

26 Ntá kuenté chjasin ntiha la kuínhin sín kixin xíkaha kónhen.

Ch'ín Jesús kjuínchekítóhe jína yaá sín t'ikonhya

27 Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kixin:

—Tíkonóehéni jaha tsík'axrjeníxian David.

28 Ntá k'uíxenhén ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekávan kixin tsjácha sít'a xíkaha? —mé xíkaha kjuanchankí ch'án.

Ntá kjuátehe sín kixin:

—Jeén, Ìnchéni, titekaonni.

29 Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xíkaha kuítekávan la tsoxiteyá —mé xíkaha ichro ch'án.

30 La ntá tuénxín ó jína t'ikon sín. Ntá ch'ín Jesús k'uetuénhen sín ch'án kixin:

—Ninkexró tsochenkahyará —ichro ch'án.

31 Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

32 Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósin ch'án la chóna ch'án nchakuen tí jínahya.

33 Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankixin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xíkaha kuenté tí nación Israel —ichro sín.

34 A ntá tí sín fariseo ntáchro sín kixin:

—Tí nkexro t'etuénhen tí nchakuen tí jínahya tsíkjanjon kjuachaxin mé xíkaha takitsje tí ch'ín i tí nchakuen tí jínahya —mé xíkaha ichro sín.

Ch'ín Jesús kuikonóhe ch'án chojni

35 Ntá k'uátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko nínko

Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uíkon ch'án kixin nchónhya chojni k'uéjó sín ntá kuikonóhe ch'án sín kixin imá tóxakonhen sín la k'uéjó sín éxí kolélo chóntahya nkexro t'ayakonhen.

³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xra mé tsjéhya.

³⁸ Chrókjuancheherá tí Ìnché tí nonte kixin chróchr'án ch'án itsjé chojni chrókjuich'e xra —mé xikaha ichro ch'ín Jesús.

10

*Ch'ín Jesús kjueyá teyó sín ts'ajiko ch'án
(Mr. 3.13-19; Lc. 6.12-16)*

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuénhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo.

³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkì la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo.

⁴ La ko k̄j̄axin ch'ín Simón, mé kuènte tí sín cananista, la ko k̄j̄axin ch'ín Judas Iscariote, mé tí nkexro chr'èx̄in k̄juínchekji tí ch'ín Jesús.

Ch'ín Jesús k'uetuēnhen tí teyó sín k̄ixin sátsjikjako sín k̄juachaxin kuènte Dios

(Mr. 6.7-13; Lc. 9.1-6)

⁵ Ntá k'uetuēnhen ch'ín Jesús tí teyó sín k̄ixin sátsji sín la k'uetōan ch'án k̄ixin:

—Tj̄ihyará tí t̄ejó tí sín jehya judío la ko t'ixeenhyará tí chjasin siín estado Samaria.

⁶ Náhi. Íchá j̄ina sátsjírá tí t̄ejó tí chojni éxí kolélo k̄juíchroe kuènte nación Israel.

⁷ Sátsjírá tj̄akohérá sín k̄ixin k̄juachaxiēn Dios t̄jen nkaya nkajní la í séhya tsi.

⁸ S̄inchekitōhérá j̄ina chojni níhi la ko s̄inchekitōhérá j̄ina tí sín chón̄ta chin lepra la ko s̄inhexechónrā chojni tsík'en la takítsjerá tí nchakuen tí j̄inahya. Jahará k̄j̄axin k̄j̄itonhanrā tí k̄juachaxiēn Dios, méxra chrók̄juachahyará jahará k̄j̄axin.

⁹ 'Chrók̄juikuahyará ninkehó chichaon oro la ko ninkehó chichaon plata la ko ninkehó chichaon cobre

¹⁰ la ko tí sátsjírá nt̄ia la chrók̄juikuahyará ka bolsa la chrók̄juikuahyará yaá ka chrók'uínk̄ayaterá la ko chrók̄juankahyará tokatárá la ko chrók̄juikuahyará nta tj̄ixinrā. Tí nkexro ch'e x̄ra la jehí siín k̄juachaxin ntiha chrók̄jón̄e.

¹¹ 'A ntá tió tsjasánrā ijnko chjasin jié o ijnko chjasin ntsí la tjéyará ijnko nkexro tsjanjon k̄juachaxin la ntōe sín ntahó chrók̄uitōhará ntá tsjixin tí x̄ra ntá sátsjírā.

12 **A** ntá tió t'ixenhenrá ntøe sín la nixjehérá sín tjáko_xinrá jnkojína.

13 **A** ntá tí chaxín jína asén sín la ts'áyéhe sín tí kjuaxróxin, a ntá tí náhí la sá_tjikorá tí kjuaxroxin.

14 **A** ntá tí tsochrohya sín tsjanjon sín kjuachaxin tsitøhará la tjinkakonhya sín tsinhin sín tí nkehe tsochronkará na mé t'axrjé_xinrá tí ntøe sín o tí chjasén sín la t'oxènjínrá tí inche chón_tatá.

15 **A** ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchón_tá sín jie la kánhyó tsjasóte sín, a ntá tí sín chjasin a la antsí tsjasóte sín kixin k'uéjóró_xinhya sín tí tan chrókuaá_xin sín.

Ókjé sín tsonínkakonhen tí sín kuènte Cristo

16 Janhan tsochr'an tí jahará é_xí yóhe chróchr'an kolélo ts'ejóyakjan kolóbo. Listo chrók'uejorá é_xí konche xikaha la chrók'uejorá é_xí kontóá chrókó_jiáhyará.

17 Chrókó_xakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etøan la ko nkaxenhen tí nínkoé sín tsjatia_xinrá sín.

18 La ntá tsjikaánrá sín tí tjejó tí sín t'etøan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhya Dios.

19 **A** ntá tió sátsjikoará sín tí tjejó tí sín t'etøan la tó_xakuanhyará nkehe tsontáchrórá o nkexrí tsonixjará kixin tió tsjixraká tí hora la ntá Dios mé tsjinkitsará tsonixjará.

20 Kixin jehya jahará tsonixjará. Ná_hí. Tí Nchakuen It'éni mé tsochrónka nkehe tsonixjará.

21 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakohen tí it'é kixin its'en.

22 Kaínxín chojni chjasintajni tsonínkakohanrá sín kixin tinkachónkirá tí janhan. A ntá tí nkexro tsítóehya tsinkáchónki sín tí janhan hasta tsjéje chjasintajni mé tsaá.

23 Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxa tjixinhya ts'atsínkará kaín tí chjasin Israel.

24 'Tí nkexro xrakohé la kánhyó tjetóan la tí maestro la antsí tjetóan, la ko kjaxin tí nkexro ch'e xra la tjetóanhya la antsí tjetóan tí lamo.

25 A ntá tí nkexro xrakohé chrókjuakoxin ch'án éxí tí nkexro kjuakohé ch'án la ko tí nkexro ch'e xra chrókjuakoxin ch'án éxí tí lámóé ch'án ch'ehe ch'án xra. Tí ch'ín ìnché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

*Nkexro tí chróchrakonhénrá
(Lc. 12.2-9)*

26 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin.

27 Tí nkehe tjonkará sítié la t'ichjánxin tsochronkará tió itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín.

28 Chróchrakuénhyará tí sín t'óyán cuérpóé chojni kixin asén chojni xitjahya ts'óyán sín.

Íchá jína chróchrakonhénrá tí nkexro tsjacha sinchek'itjáyanxín cuérpóé chojni la ko asén chojni tí xrohi ts'ankahya.

²⁹ '¿Á chrókóxixinhya yaá koxroxé ntsínsí ijnko chichaon ntsí? A ntá kjónté xíkaha la chrók'uánótjenhya nijnko tí jehe va nonte tí chrókjuanjonhya It'éni kjuachaxin.

³⁰ A ntá kjónté tí kaxihí chóna ikjára la ó nohe ch'án nkekjaín ka chontará.

³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuèhya tsochrónka sín kixin tinkáchónki sín Cristo nkayakon chojni
(Lc. 12.8-9)

³² 'Kaín tí chojni tsochrónka kixin tinkáchónkina sin nkayakon chojni la janhan mé kjaxin tsóxrjanka kixin choxian tí jehe sín nkayakon T'aná tjen nkaya nkajní.

³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

Jnkokoáhya tsjenkayáxin chojni kixin ó kui Ínchéni Jesús

(Lc. 12.51-53; 14.26-27)

³⁴ 'Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan.

35 Janhan k'uinka kixin tsonínkakohen chojni it'é, la ko tí xjeen sín chjin mé tsonínkakohen iné, la ko tí tíkintá tsonínkakohen ich'ee.

36 Mé xikaha tí sín tsonínkakohen kichó la mé tí sín naxá kjéhya sín.

37 'A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuèntana.

38 La tí nkexro tamáhya ntacruz, chrèhya sín tí janhan la mé xitjahya ts'óna sín kuèntana.

39 Tí nkexro tjinkaon kixin kohya nkehe chrókónhen sín mé ts'itjayan sín, a ntá tí nkexro chrókjuinçek'itjayanxín asén kixin tinkáchónki sín tí janhan la mé tsaá sín.

*Tí nkexro ts'áyéhe nkehe
(Mr. 9.41)*

40 'Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka.

41 La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jína kixin jína ch'án mé xikaha ts'áyéhe sín nkehe éxí ts'áyéhe tí nkexro jína.

42 A ntá tí nkexro sinçekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a

mé chaxín ts'áyéhe ch'án nkehe jína kixin xikaha kjuích'e ch'án.

11

Ch'ín Juan Bautista k'uetuēhen iso sín (Lc. 7.18-35)

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuíkjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntōechiso ntá xrínahya kuínhin ch'án nkerí xra tjech'e Cristo. La ntá k'uetuēhen ch'án iyó tí sín k'uék'ajiko ch'án kixin sátsjitsjehe sín tí ch'ín Jesús.

³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxa tsochónhenni íjko nkexro? —ichro sín.

⁴ A ntá kjuátēhe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhínrá.

⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóá sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòa mé síxrakehé sín tí tan jína tsaáxin sín.

⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankíxin nixjehe ch'án tí sín k'uéjó la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xr̄int̄o?

⁸ Tí náhí, la ¿nkehe k'uíkonrá? ¿Á k'uíkonrá ch'án éxí ijnko nkexro tsík'itsa jína? Jahará ó nohará ḱixin chojni tsík'itsa jína la tjejó sín tí nchia kuènte tí sín rey.

⁹ ¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la āntsí chón̄ta ch'án kjuachaxin la tí sín k'uéchrónka itén Dios la kánhyó.

¹⁰ Ch'ín Juan mé tí nkexro kui éxí x̄ikaha chrónka xroon itén Dios ósé. Mé ntáchro x̄ikihi:

Janhan mé tsochr'an ijnko nkexro tsochrónka itan kuènt̄ana tsitónxin nt̄ia,

ḱixin tsjasiyóxin ch'án nt̄ia kuènt̄a.*

Mé x̄ikaha chrónka itén Dios.

¹¹ Ntá ijnko nkehe chaxín tsot̄jonkará ḱixin kaín tí nkexro k'uéjó senó la kánhyó tjētoan sín la āntsí tjētoan tí ch'ín Juan Bautista. Kjánchó ijnko nkexro k̄jonté tjetuanhya la tí ts'áyéhe sín tí kjuachaxién Dios tjen nkaya nkajní la āntsí tjētoan sín la ntá jehe ch'ín Juan la kénhyó.

¹² 'Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chón̄ta kjuachaxin mé tsjacha sín.

¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan.

¹⁴ A ntá tí jahará chrókuítekáonrá tíhi; ḱixin ch'ín Juan la mé ikui ḱixin tí xr̄a kuènte ch'ín Elías tsjin-

* **11:10** Malaquías 3.1

taxín sich'e ch'án kixin ch'ín Elías la t'ichjánxin chrókui ch'án inaá.

¹⁵ Tí nkexro tjinkaon chrókuinhin la chrókuinhin.

¹⁶ ¿Nkexrí chrókjuintayóaxian tí chojni tjejó ijie? Tóyóhe sín tí chánjan tjejótxin sín ntsin tsítán sín la t'íyehé sín kichó sín

¹⁷ ntáchro sín kixin: “K'uánoani flauta kjánchó jahará la tehyará. Itsjeni isón kuènte chojni tsík'en la ntá k'uaváhyará la ko tsjankahyará.”

¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrorá kixin ijnko nchakuen tí jínahya mé chóna ch'án.

¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrorá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkí, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí chjasin titekakonhya

(Lc. 10.13-15)

²⁰ Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixin ch'án kjuaxroan kixin kjónté xikaha la naxa kuinkáchónkihya sín Dios.

²¹ Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxin sín chrók'uinkáya sín ka tié la ko nteso chrókjuinçek'ia sín asén sín.

²² Ntá ntáxrjan ḱixin tí yaon tsitoexín ijíe chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín.

²³ A ntá jahará chojni chjasin Capernaum tjenkayáxinrá ḱixin imá nohará a ntá sátsjírá nkaya nkajní, ichrorá, kjánchó chaxínhya. Jahará la tsjasinkajjinxinrá ntiha sátsjírá tsjasótiará tí siín tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uixin sín naxa chrók'uitjáyanhya sín tí yaon ijie ḱixin tjoka chrókuitekaon sín.

²⁴ A ntá tjonkará ḱixin tió sinchekitoéxín Dios ijíe chojni la antsí tsjasótiará la tí sín chjasin Sodoma la kénhyó tsjasóte sín.

*Xrákirá tí tjén janhan la ts'ok'áhará
(Lc. 10.21-22)*

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án ḱixin:

—Tjáncháha kjuasáya It'éni mé Ìnché nkaya nkajni la ko chjasintajni ḱixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin ḱixin ts'itja tí sín noehya.

²⁶ Mé xikaha It'éni jaha kóxrjínhan ḱixin xikaha tsonhen —ichro ch'ín Jesús.

²⁷ Ntá ntáchro ch'ín Jesús ḱixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín ch'án.

28 Xrákirá kaín rá tí tjén janhan tí jahará imá tsíkóxrjé_rá kjuich'erá x_rá la yamará nkehe iye la ntá janhan mé sintak'ok'áhará.

29 Tákjára tí x_rá kuéntana la ts'itjará kuéntana kíxin janhan mé jína asenná la ntahnkehya. Ntaha mé ts'itjará ts'ok'èxin asánrá.

30 Tí x_rá tsotjahará la x_rahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigo ijnko yaon t'ok'éhe tí sín Israel

(Mr. 2.23-28; Lc. 6.1-5)

1 **A** ntá ijnko yaon la ch'ín Jesús k'uátsínka ch'án ijnko nonte siín noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankíxin sín ik'uín sín iso noatrigo a kíxin sine sín.

2 **A** ntá iso tí sín fariseo k'uíkon sín kíxin xikaha kjuích'e tí sín xriko ch'ín Jesús la ntá ntáchro sín kíxin:

—Tsjuhé tí sín xrikoa mé tjejóch'e sín x_rá tí yaon t'ok'éheni na mé kohya kjuachaxin tsonhen x_rá tí yaon i —ichro sín.

3 Ntá kjuátehe ch'ín Jesús kíxin:

—Jahará ¿a kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta?

4 **A** ntá jehe sín mé k'uíxenhen sín tí nchia kuènte Dios la kaín sín kjóne sín tí niotja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín nchat'á.

⁵ Jahará ¿á nchekuáxinhyará tí xroon tsíkjin ch'ín Moisés ntáchro kixin tí sín nchať'á kuènte n̄nko mé t'ok'èhya sín tí yaon sábadó la kjónté xíkaha la jehya j̄ie tíha?

⁶ Ntáxrjan kixin itjén janhan la antsí má chonta kjuachaxin la ntá tí n̄nko la kénhyó.

⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrókuiikonóehérá chojni la tjínkakhonhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó j̄ie chontahya.

⁸ A ntá tí Xjeen Dios K'óna Chojni mé chóna kjuachaxin ts'etóan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jína ijnko chojni tsíxámá tja

(Mr. 3.1-6; Lc. 6.6-11)

⁹ Ntá ch'ín Jesús mé sákjuíxin ch'án ntiha la k'uíxenhén ch'án ijnko n̄nko Israel.

¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjinkaon sín tsjanchia sín j̄ie. La ntá kjuanchankíhi sín ch'án kixin:

—¿Á síin kjuachaxin sinchekitoheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátēhe ch'ín Jesús ntáchro ch'án kixin:

—Jnkojín tí jahará chontará ijnko kolélo chrókjuítsínkáya ijnko tòyē tí yaon t'ok'éheni ¿á chrókjuíhyará chrókuakitsjetaónrá va tòyē ní?

* 12:7 Oseas 6.6

12 Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

13 Méxra nixjehe ch'án tí ch'ín níhi a, ntáchro ch'án kixin:

—Tjéntoá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxí tí í jnko tja ch'án xikaha.

14 Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyán sín tí ch'ín Jesús.

Itén Dios senó chrónka kuènte ch'ín Jesús

15 A ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekítóhe ch'án jína kaín tí sinníhi

16 la k'uetqan ch'án kixin tsochrónkahya sín noxín kixin nkexro tí jehe ch'án.

17 Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikihi:

18 Ntihi tjen tí nkexro ch'ena xra la janhan mé kjuéyá ch'án,

janhan tjuaha ch'án la chàna kixin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sintakitoaxián ijíé chojni chjasintajni.

19 Tsonínkakuenhya ch'án chojni la chjiníhya ts'óyako ch'án,

la ko kohya nkexro tsinhin itén ch'an tí ntja.

20 Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe
sínchikoá.

Jehe ch'án naxa sich'e ch'án xra tsjixrakájia tí yaon
ts'etōan ch'án.

²¹ La kaín xín chojni chjasintajni mé tsitekaon sín
tí jehe ch'án.†

Mé xikaha chrónka itén Dios ósé.

*Tí sín fariseo mé ntáchro sín kixin ch'ín Tsochren
t'etuenhen asén tí ch'ín Jesús*

(Mr. 3.19-30; Lc. 11.14-23; 12.10)

²² Ntá iso chojni sákjuíkohe sín ch'ín Jesús
ijnko ch'ín t'ikonhya la ko nixjahya kixin chóna
ch'án nchakuen tí jínahya. A ntá ch'ín Jesús mé
kjuínchekitōhe ch'án jína la ntá jína nixja ch'án la
ko jína t'ikon ch'án.

²³ Ntá kaín xín chojni la chrakon sín la tjan-
chankíhi kichó sín ntáchro sín kixin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya
kixin chóna ch'án tí kjuachaxin kuente ch'ín
Beelzebú, mé tí ch'ín mé Tsochren t'etuenhen kaín
tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin
sín ntá ntáchro ch'án kixin:

—Jnkojín gobierno jnkokoáhya tjenkayáxin
sín ntá tjanjonko kichó sín na mé ts'itjáyán tí
kjuachaxin ts'etōanxín sín, la ko kjaxin tí sín
jnkokoá chjasin o tí sín jnkokoá nchia jnkokónhya
tjenkayáxin sín la kjaxin xikaha ts'itjáyán sín.

† **12:21** 12.18–21 Isaías 42.1-4

26 A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetan.

27 Jahará ntáchrórá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxin sín kixin ntoáhya tjenkayáxinrá.

28 A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejorá.

29 '¿Nkexrí chrók'uixenhen ijnko nkexro ijnko ntøe ijnko ch'ín jiehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

30 'Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'ínkákonhen tí xra it'a.

31 'Méxra xrjanka kixin Dios tsjakjijn jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjijn ijie sín.

32 La ko xrjanka kixin kaín nkehe t'ántaxínhínrá tí Xjeen Dios K'óna Chojni la tsjakjijn Dios. A ntá tí ts'ántaxínhínrá Nchakuen Dios la ntá mé í tsjinhya tí ijjará kjónté ntihi chjasintajni la ko kjónté tí chr'éxin.

*Tí nta chrókuatsqanxin sín tí to jína
(Lc. 6.43-45)*

33 'Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsqanxínni tí to a.

34 Jahará tsík'axrjeníxinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxí ntáchró asánrá mé nixja ir'vará.

35 Ijnko chojni jína mé jína nixja kíxin jína asén ch'án. A ntá ijnko chojni jínahya mé nixja tí nkehe jínahya kíxin tí asén ch'án kjaxin jínahya.

36 Ntá tjonkará kíxin itsi tí yaon tsjixixín tió sinchekitoexín Dios ijje chojni ntá tsonohará kaín nkehe chjíní tsínixjará.

37 Kíxin tí nkehe nixjará tsjakoxin á kjuásinrá jie ní o náhí.

*Tí sín jehya jína tjanchehe sín ch'ín Jesús kíxin tsjakoxin ch'án ijnko kjuaxroan jie
(Mr. 8.12; Lc. 11.29-32)*

38 Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchró sín kíxin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexínni kíxin nkexro jaha —ichro sín.

39 Ntá kjuátehe ch'ín Jesús ntáchró ch'án kíxin:

—Tí sín jínahya la ko tí sín kúitqhe Dios mé tjanchia sín chrókjuásian kjuaxroan náxrjón. Kjánchó tsjakoxinhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé.

40 Éxí yóhe kjuák'e ch'ín Jonás iní yaon la iní tie nkaxenhen tsee koche jie mé xikaha tí Xjeen Dios K'óna Chojni tsjak'e nkaxenhen tòye tsoxravá iní yaon la iní tie.

41 A ntá tí yaon tsitoexín ijíe chojni la ntá tí sín chjasin Nínive mé tsjanchia sín jie kixin tí sín tjejó jie, kixin tí sín chjasin Nínive mé kuítóhe sín ijíe sín tió kuínhin sín itén Dios chrónka ch'ín Jonás. A ntá ijie itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuítekákonhyará tí janhan.

42 Kjaxin tí yaon tsitoexín ijíe chojni la tí tjan reina k'uetōan kjuixín nó Sur mé tsjanchia tjan jie kixin tí sín tjejó ijie kixin jehe tjan kjuixín imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijie itjén janhan la janhan antsí má nōna a ntá ch'ín Salomón la kénhyó k'uénohe ch'án.

*Tió tsokjan tí nchakuen tí jínahya
(Lc. 11.24-26)*

43 'A ntá ijnko nchakuen tí jínahya tsík'axrjexín ijnko chojni la mé ixri tí nonte xámá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe.

44 La ntá kjuenkayáxin kixin: “Áxri tsokjan ntōna k'uaxrjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntōe la náxrjón tsjehe tí nkaxenhen nchia.

45 A ntá k'uikon tí jínahya xikaha tjen nchia la ntá sákuikakjín í jnko yato nchakuen tí jínahya antsí má jínahya. A ntá kaín k'uixenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín siín ijie titekakonhya.

*Tí ìné la ko kichó ch'ín Jesús
(Mr. 3.31-35; Lc. 8.19-21)*

⁴⁶ Ntá ch'ín Jesús naxa tjenixjehe ch'án chojni la ntá xrinahya kjuíji ìné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús.

⁴⁷ Ntá ijnko nkexro ntiha sákjuíchénka tí ch'ín Jesús, ntáchro ch'án kixin:

— Ìná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátēhe ch'án nixjehe ch'án tí nkexro chrónka a, ntáchro ch'án kixin:

— ¿Xá nkexro tí naná la ko nkexro tí kichiná?
— ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

— Tí sín i la mé naná la ko kichiná.

⁵⁰ Tí jnkojín sín i nchexiteyá nkehe tjinkaon T'aná tjen nkaya nkajní na mé táha mé naná la ko kichiná mé xikaha t'íkuān tí jehe sín —ichro ch'án.

13

*Ch'ín Jesús mé kjuíncheyóexin ch'án éxí ijnko chojni t'enka nontee
(Mr. 4.1-9; Lc. 8.4-8)*

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon.

² Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabarco kjuák'etjaxin ch'án la kaín sín na tí chrínta ntá ó kuítóhe sín.

³ **A** ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxí ijnko ch'ín sákjuík'enka nontee

⁴ mé xíkaha sákjuík'enka ch'án iso tí noatrigo a. Ntá iso noa la tsík'ánótjen ntia ntá ikui koxroxe k'uínka va noa.

⁵ **A** ntá iso noa na mé k'uitji chrík'á xro tí kohya itsjé nche ntá tjoka k'uayan kixin ntaha tjínhya chóna nche.

⁶ Ntá tí kjuiton yaon la ntá tí ka la xamá kixin nínkahya chóna nuée.

⁷ **A** ntá í so noa kjuítsínkak'á tí siín kach'i na k'uánkí tí kach'i a na ntá í xitjahya k'uánkí tí noatrigo a kixin tsíkate tí kach'i.

⁸ **A** ntá tí noa tsík'itjí nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá íjnko mé k'óna sesenta neno noa, a ntá íjnko mé k'óna treinta.

⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuèté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuèté xíkaha nixjehé sín ncheyóexián?
—ichro sín.

¹¹ **A** ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkitsa tsonohará tí nkehe noehya í so chojni kuènte tí kjuachaxin kuènte Dios. **A** ntá tí jehe sín a la náhí.

12 Tí nkexro ó chón_ta nkehe la antsí ts'áyéhe sín kixin antsí má tsochón_ta sín. A ntá tí nkexro chón_tahya la kjónté tí ntsí chón_ta sín la ts'axrjehe sín.

13 Mé xikaha kju_{int}ayóaxuán kjuákuaxian sín kixin jehe sín t'ikon sín la ntá kjónté tjátsoanhya sín la tjejó_tinhin sín a ntá kjónté kienxínhya sín.

14 Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsienxínhya sín la ts'ikon sín la tsjatsóanhya sín tí nkehe ts'ikon sín.

15 Imá icha asén tí sín chjasin i.

Chón_ta sín ntatsjon kjánchó ts'íkjehe la chón_ta sín ikon sín kjánchó t'ikonhya sín, kixin chrók'uikonhya sín la chrókuienhya sín la ko xitjahya kíenxín sín, kixin í tjinkakonhya sín chrókjan sín kixin janhan mé chró_{kju}intakitohá sín jína.*

Mé xikaha tsíkjin ch'ín Isaías.

16 Ntá ntáchro ch'ín Jesús inaá kixin:

—A ntá jahará la imá náxrjón tjejorá kixin t'ikonrá la ko tinhín_rá.

17 Chaxín xrjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuinhin sín tí nkehe tjejó_tinhín_rá la ntá kuíenhya sín.

* 13:15 13.14–15 Isaías 6.9–10

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

18 Tínhínrá nkexrí t'axrjexín tí ch'ín sákjuík'enka nontee.

19 Tí nkexro kuínhin tí itén Dios chrónka nkexrí tí kjuachaxin kuente Dios la ntá kíenxínhya sín la yóhe tí noa xènjintja ntja. Ó kui ch'ín Tsochren ntá kjuínchek'itjáyan ch'án tí itan jína kuínhin sín.

20 A ntá tí tje kjuítsínkak'á xrə la mé t'axrjexín kixin tí chojni kuínhin itén Dios la tjoka kóxrjínhin sín la kuínkáchónki sín.

21 Kjánchó nínkahya chóna nuèe na ntá itsi tí kjuaxróxinhya o tsochónkíhi sín chojni chrók'óyán sín kixin tí itén Dios kuítekaon sín, a ntá tsítóhe sín tí tinkáchónki sín Dios.

22 A ntá tí tje kjuítsínkak'á kach'í na mé éxí yóhe ijnko chojni kuínhin itan jína kjánchó tjitoxienhya ntje sín kixin tóxakonhen sín tí xrə chóna sín chjas-intajni la ko tjinkaon sín tsochóna sín itsjé nkehe. Kaín tíha mé t'ínkákonhen tí itén Dios kuínhin sín la ntá xikaha xitjahya sich'ehe sín xrə Dios.

23 A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kíenxín sín la ntá xikaha jína ch'ehe sín Dios xrə. Na iso sín la yóhe éxí tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxí tí kajnto k'uánkíkué tí noatrigo

24 Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhē ijnko ch'ín k'uēnkā noa jína nontēē ch'án.

²⁵ A ntá tió k'uéjójua kaín sín ntá ikui ijnko nkexro nínkakonhen sín la k'uēnkā ch'án kajnto chrík'á tí noa a la ntá sákjuí ch'án.

²⁶ La ntá tí noatrigó k'uánkí la ntá ó sítintāa la ntá ntiha kjaxin kónoxíxin k'uánkí tí kajnto.

²⁷ Ntá tí sín ch'e xrā mé sákjuínixjehē sín tí lámōē sín la ntáchro sín kíxin: “Tí noa k'uènká nontāa la noa jína tíha. A ntá ħnketí kjuixín tí kajnto tsík'ayan?” ichro sín kjuanchankí sín.

²⁸ Ntá kjuátehe tí ìnché tí nonte ntáchro kíxin: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xrā mé kjuanchankí sín kíxin: “ĤÁ tjinkávan kíxin sátsjini tsakitsjenkíni tí kajnto?” ichro sín.

²⁹ A ntá kjuátehe ch'án kíxin: “Náhí. Tí sátsjia tsakítsjenkiá tí kajnto la kjá chónte tí katrigo ts'axrjenkí.

³⁰ Íchá jína tìtohé kíxin ts'ánkíkué tsjixin tsotjájiani. Ntá ts'etuenhenni tí sín tsotjá kíxin senó ts'ejo sín tí kajnto la sinchenteto sín kíxin tsoche la ntá chr'éxin tsotjá sín tí noatrigó ntá ts'inkachjina tí noa a” —mé xíkaha chrónka ch'ín Jesús.

Ch'ín Jesús kjuíncheyóēxin ch'án éxí tí xroān ijnko ntayoa it'in mostaza

(Mr. 4.30-32; Lc. 13.18-19)

³¹ Ntá ch'ín Jesús kjaxin kjuíncheyóēxin inaá ntáchro ch'án kíxin:

—Tí kjuachaxin kuènte Dios mé éxí yóhē ijnko tje mostaza k'uēnkā ijnko chojni nontēē ch'án.

³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jié la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'ín Jesús kjuíncheyóexin ch'án éxí tí xroan t'ánkíxin niotja

(Lc. 13.20-21)

³³ Kjaxin kjuíncheyóexin ch'án tíhi mé ntáχρο ch'án kixin:

—Tí kjuachaxin kuènte Dios mé éxí yóhe tí xroan t'ánkíxin niotja. Kjuinkíkjanxin ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án

(Mr. 4.33-34)

³⁴ Ch'ín Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án.

³⁵ Mé xikaha kjuako ch'án kixin tsoxiteyá tí nkehe tsíchronka ijnko nkexro k'uéchronka itén Dios ntáχρο xikihi:

Mé tsoníxjaxiā sintayóaxión nkehe tsontáxrjan tí nkehe ninkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'ín Jesús tí sín a ntá sákjuí sín kaín sín la jehe ch'án k'uíxenhen ch'án nchia. Ntá kóchjina tí sín k'uájiko ch'án la ntáχρο sín kixin:

—Chronkaxiān nkexrí t'axrjexín tí kajnto k'uánkíkué tí noa trigo tí nonte —ichro sín.

† 13:35 Salmo 78.2

37 Ntá ch'ín Jesús kjuátehe ch'án ntáchro ch'án kixin:

—Tí nkexro k'uenka tí noa jína mé tí Xjeen Dios K'óna Chojni.

38 A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuènte Dios. La ntá tí kajnto mé éxí yóhe tí chojni t'etuèhen Tsochren.

39 Tí nkexro nínkakönhenni mé k'uenka tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel.

40 Éxí xrenájín tí kajnto la tsoche mé xikaha tsonhen tió tsjixixín tsjeje chjasintajni.

41 Tí Xjeen Dios K'óna Chojni mé ts'etuèhen tí sín ángel kixin tsakitsjexín sín tí tjet'etoan Dios kaín tí chojni tjachroe í so chojni la ko tí sín ch'e tí nkehe jínahya.

42 La tsochr'án sín sátsji sín tí tja siín xrohi la ntaha tsotsjanka sín la sinetaón neno sín.

43 Ntá kaín xín tí sín nchexiteyá tí nkehe tjinkaon Dios mé éxí tí yaon xikaha tsotsjehe sín tí tjet'etoan It'éni Dios. Tí nkexro tjinkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

44 Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emā ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:

—Kjaxin tí kjuachaxin kuènte Dios mé éxí yóhe ijnko nkexro tjeyá xro perla náxrjón.

⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin:

—Kjaxin tí kjuachaxin kuènte Dios mé éxí yóhe ijnko nchísén tséya chojni koche t'enkí sín tí ntayaon la ntá tsotsé nchónhya clase koche.

⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín.

⁴⁹ Mé xikaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitohe tí chojni jína.

⁵⁰ La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjetentaxin

⁵¹ Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní? —ichro ch'án.

Ntá kjuátēhe sín kixin:

—Jeén, Ìnchéni, ó kíenxínni —ichro sín.

⁵² Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la

jehe ch'án la éxí yóhe ijnko ìnché nchia chóna itsjé nkehe tjete tjejóhjiná la ntá nohe ch'án tsakitsje tí nkehe tjete nixin la tí nkehe tjetentaxin —mé xikaha ichro ch'ín Jesús.

*Ch'ín Jesús kjuák'e ch'án chjasin Nazaret
(Mr. 6.1-6; Lc. 4.16-30)*

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuixin ch'án ntiha.

⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohe ch'án kixin imá nohe ch'án la ko nkexrí kixin tjasin ch'án kjuaxroan?

⁵⁵ ¿Á jehya tíhi xjeen tí ch'ín carpintero la ìné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas.

⁵⁶ Kjaxin tí sín chjin kichó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntəe ch'án mé tjikosáyeheya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuítekakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ **A** ntá tí yaon a ntá tí ch'ín Herodes mé tí nkexro k'uetōan tí estado Galilea mé kuínhin ch'án nkexrí ichro ch'ín Jesús.

² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etōan kixin ch'ín Juan tsontetoxín cadena la ko tsjak'echjina ch'án. Mé xikaha kjuích'e ch'án kixin xikaha tsíkjanchia tí tjan Herodías, tí tjan ichjién tí ch'ín Felipe, kichó ch'án.

⁴ Tí ch'ín Juan tsintáche ch'án tí ch'ín Herodes kixin:

—Jehya jína tsochonta tí ichjién tí kichuá —mé xikaha tsintáchro ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín.

⁶ **A** ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehē ch'án. **A** ntá imá kóxrjinhin ch'ín Herodes nkexrí ité tjan.

⁷ La ntá nixjehe ch'án tjan k'uákjenxin ch'án ihnié Dios ntáchro ch'án kixin tsochjéhe ch'án tjan kjónté jnkojín nkehe tsjanchia tjan, ichro ch'án.

⁸ Ntá jehe tjan la senó kjuíkjanchankíhi tjan ìné tjan ntá ìné tjan tsintachro kixin ikja ch'ín Juan mé

tsjanchia tjan ntá jehe tjan mé nixjehe tjan tí ch'ín Herodes ínaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín síin ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án.

¹⁰ Méxra k'uetōan ch'án kixin ts'óchrínjin sín ikja ch'ín Juan tí tjen ch'án ntōechiso.

¹¹ Ntá kjuikao sín kjuikoyá sín tí kja ch'ín Juan ijnko plato la chjehe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpōé ch'án la sákjuikjává sín. La ntá chr'éxin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

*Ch'ín Jesús kjuínchekjine ch'án in'ó mil chojni
(Mr. 6.30-44; Lc. 9.10-17; Jn. 6.1-14)*

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'uit'ótjen ch'án ijnko ntabároç la sákjuí ch'án ijnko nonte ninkexró tji-hya. A ntá kaín tí chojni la kuínhin sín nketí tjen ch'án la ntá k'uaxrjexín sín chjasén sín la ntá totó sín sákjuíchréhe sín ch'án.

¹⁴ A ntá k'uaxrjexín ch'ín Jesús tí ntabároç a, a ntá k'uikon ch'án kixin nchónhya chojni síin ntiha ntá kuikonóhehe ch'án tí jehe sín na ntá kjuínchekitohe ch'án jina tí sín níhi tsíkjkao sín.

¹⁵ La ntá ó k'uixin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kíxin sátsji sín tí chjasin ntsí chjinaxón tsjik'ēna sín nkehe sine sín —ichro sín.

¹⁶ Ntá kjuátēhe ch'ín Jesús, ntáchro ch'án kíxin:

—T'ichjánxinhya sátsji sín. Chjēherá sín nkehe sine sín —ichro ch'án.

¹⁷ Ntá kjuátēhe sín kíxin:

—Chóntahyani itsjé nkehe. Jehó in'ó niotjā la ko yaá koche chóntani —ichro sín.

¹⁸ Ntá ntáchro ch'ín Jesús kíxin:

—Xrakoanará tí nkehe méhe ntihi —ichro ch'án.

¹⁹ Ntá k'uetōan ch'án kíxin kaín xín sín ts'ixitjāxin sín tí chrítaón kaxi a. Ntá kuákja ch'án tí in'ó niotjā la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ō ch'án tí niotjā chjēhe ch'án tí sín k'uájiko ch'án la jehe sín mé k'óxikayēhe sín chjēhe sín tí chojni siín a.

²⁰ Ntá kaín sín kjuixin kjóne sín kókjēhe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxēhe sín la mé teyó ntaxra kaón.

²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

*Ch'ín Jesús mé tjetjitaón ch'án ntā
(Mr. 6.45-52; Jn. 6.16-21)*

²² Ntá kjuixin tíha ntá k'uetuēnen ch'ín Jesús tí sín k'uájiko ch'án kíxin ts'it'ótjen sín tí ntabárcō ts'atōyē sín í jnko nánko ntayaon. Ntá jehe ch'án naxā kuítóhe ch'án nixjēhe ch'án tí sín siín ntiha.

23 Ntá kjuixin xíkayehe sín na ntá jehó ch'án chrìn ch'án ijnko jnā tsonixjehe ch'án It'é ch'án tjen nkaya nkajní. Na ntá ó k'uixin tie la jehó ch'ín Jesús itjen ch'án ntiha.

24 La ntá tí ntabárcō na mé tjenkátaón ntā jnkosiné ntayaon. Ntá imá chjéhe ntā tí ntabárcō kixin tí xrintō la chjéhe la xitjahya sátsji ntabárcō.

25 Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín.

26 Na ntá tí sín k'uájiko ch'án mé k'uikon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

27 Na ntá nixjehe ch'ín Jesús tí jehe sín ntá ntáchro ch'án kixin:

—Nchefuérte asánrá, chrakonhyará. Janhan kjuihá —ichro ch'án.

28 Ntá ch'ín Pedro mé nixjehe ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntā tsjijini tí tjen jaha —ichro ch'án.

29 Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankixin ch'án tjetjitaón ch'án ntā sákjuíchréhe ch'án tí tjen ch'ín Jesús.

30 A ntá xínahya ntá kónohe ch'án kixin imá chjéhe xrintō chrítaón ntā, ntá chrakon ch'án la kjuankixin tinkák'aniánki ch'án ntā, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuènté títekákonhya? —ichro ch'án.

³² Na ntá tió k'uit'ótjen sín yói sín tí ntabárc̣o la ntá tuénxín k'uixratá tí xṛinto.

³³ Ntá kaín xín tí sín tjejóxehen tí ntabárc̣o mé k'uéjoxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitohe jína tí chojni níhi nonte Genesaret

(Mr. 6.53-56)

³⁴ Ntá tió k'uatòye sín tí ntayaon ntá kjuíji sín tí nonte Genesaret.

³⁵ Ntá tí sín siín ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinaxón ntiha la ntá kuikao sín kaín tí sín níhi tí tjen ch'án.

³⁶ Na ntá chrónóehe sín ch'án kixin chrókuítóhe ch'án kixin kjónté chrínta iké ch'án chrókuákóxin sín, la ntá kaín tí sín kuákóxin iké ch'án mé kuítóhe sín jína.

15

Tí jie tjasin chojni

(Mr. 7.1-23)

¹ A ntá chjasin Jerusalén kjuixín iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín

tsík'axrjeníxinni ḱixin t'óntihya sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús ḱixin:

—¿Nkekuénté jahará kjaxin títekákonhyará nkehe tsík'etōan Dios? A ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjeníxinrá.

⁴ Ntáchro Dios ḱixin: “Tsochontehérá kjuasáya it'ará la ko ìnará”, la ko ntáchro ch'án ḱixin: “Tí nkexro t'ántaxínhjin it'é la ko ìné la chrók'uen.”*

⁵ A ntá jahará tsíntáchrórá ḱixin ó nchōxon ḱixin ijnko nkexro tsochénka it'é la ko ìné ḱixin: “It'éni, ìnéni, chrokjuahya tsjinkítsani tí jaha ḱixin kaín nkehe chóntani la ó chjéheni Dios.”

⁶ A ntá jnkojín nkexro tsontáchrō ch'án tíhi ntá í t'ichjánxinhya tsjinkítsa tí it'é la ko tí ìné, mé xíkaha tsixrorá. Mé xíkaha jahará kuítōhérá tí nkehe k'uētōan Dios ḱixin tjinkáonrá chrókjuich'erá éxí kjuích'e tí sín tsík'axrjeníxinrá.

⁷ Jahará la jehya jnkojínxón tjenkayáxinrá. Ntoá tsíntáchrō tí ch'ín Isaías, tí nkexro k'uéchrónka itén Dios ósé. Mé chrónka ch'án ḱixin nkexrí tjejorá la xíkaha tsíkjin ch'án ḱixin:

⁸ Tí chojni tí chjasin i ir'va ó xraxinkakonxín sín tí janhan

a ntá tí asén sín la ikjín kuítóhe sín tí janhan.

⁹ Méxra ó chónko tóchjina sín xraxinkaon sín tí janhan

ḱixin tí nkehe tjako sín la tí nkehe tsík'etōan chojni

ó.†
Mé xíkaha ichro itén Dios.

* **15:4** Éxodo 20.12; 21.17; Levítico 20.9 † **15:9** 15.8-9 Isaías 29.13

10 Ntá k'uíyehē ch'ín Jesús tí chojni ínaá la ntáchro ch'án kixin:

—Chrókuinhínrá la ko chrókuiénxinrá.

11 Kaín nkehe ine chojni la ó nchoxon, jehya jìe. Tí jìe la tí nkehe t'axrjexín ir'va chojni —mé xíkaha ichro ch'ín Jesús.

12 A ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

13 Ntá kjuátēhe ch'án ntáchro ch'án kixin:

—Kaín tí ka jehya T'aná tjen nkaya nkajní k'uenkaxin la mé ts'axrjenkixin nuèe.

14 Nté tìtohé sín. Tí jehe sín la ntakótán sín la t'etuenhen sín í so sín ntakótán. A ntá tió ijnko chojni ntakótán tjitaón ntja la ntá yóí sín ts'anótjenyá sín ichrén tòyē —ichro ch'án.

15 Ntá ntáchro ch'ín Pedro kixin:

—Chronka nkexrí t'axrjexín tíha —ichro ch'án.

16 Ntá kjuátēhe ch'ín Jesús ntáchro ch'án kixin:

—¿Á kjaxinrá jahará tiénxinhyará?

17 ¿Á tiénxinhyará kixin kaín tí nkehe ineni na sátji nkaya tseeni na ko xík'axrjexín tí cuérpoeni ínaá?

18 A ntá tí nkehe t'axrjexín ir'va chojni la t'axrjeníxin asén chojni la tíha la mé tí jìe tjasixín chojni.

19 Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kíchó sín la ko tí tjachehē kíchó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxínhin kíchó sín.

20 Tí nkehe a mé tjasixín chojni jje. A ntá tí sineni kjónté nchexiteyáhyani ts'ónti tjani la tíha la jehya jje —mé xikaha ichro ch'ín Jesús.

Ijnko tjan jehya sín israelita mé kuinkáchónki tí ch'ín Jesús

(Mr. 7.24-30)

21 Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón.

22 Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóghéni kixin tí xjeenni chjin la mé níhi tjan chóna tjan ijnko nchakuen tí jínahya —ichro ti tjan a.

23 A ntá ch'ín Jesús la ninkehó kjuátèehya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuènhén tjan sátsji tjan kixin tinkák'óyako tjan chréhe tjan tí jeheni —ichro sín.

24 Ntá ntáchro ch'ín Jesús kixin:

—Dios mé ichr'ánna tsjéyá jehó tí kolélo kjuíchroe kuènte nación Israel —ichro ch'án.

25 A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Ìnchéni, tjínkítsani —ichro tjan.

26 A ntá ch'ín Jesús kjuátèhe ch'án ntáchro ch'án kixin:

—Jehya tí jína chrókuakitsjahā niotjā tí xjan ntá chrótjahā koniā chrókjóne va —ichro ch'án.

27 A ntá jehe tjan la ntáchro tjan kixin:

—Chaxín x̄ikaha, ìnchéni. Kjánchó kjónté tí konj̄a na tí nkehe tsjixènjinnkí mesa kuènte ìnché la ine va —ichro tjan.

²⁸ Ntá ntáchro ch'ín Jesús kixin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekítóhe jína nchónhya chojni níhi

²⁹ Ntá ch'ín Jesús mé sákjuíxin ch'án ntiha la kjuíji ch'án chrínta ntayaoon Galilea. Ntá chrìn ch'án ijnko jn̄a la ntiha kjuák'etj̄ax̄in ch'án.

³⁰ Ntá kójnkotsé itsjé chojni tí tjen ch'án la kjuik̄ao sín tí s̄inníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so s̄inníhi. K'uejo sín tí s̄inníhi toté tí ch'ín Jesús kixin jehe ch'án mé sinchekítóhe ch'án sín jína.

³¹ Kaín chojni la imá chrakon sín kixin k'uíkon sín kixin tí sín k'uénixjahya la ó nixja sín la tí sín tsixénká la tsíkítóhe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuènte tí sín Israel.

Ch'ín Jesús mé kjuínchekjine noó mil chojni (Mr. 8.1-10)

³² Ntá k'uíyeh̄e ch'ín Jesús tí sín k'uájiko ch'án la ntáchro ch'án kixin:

—Imá t̄ikonó̄aha kaín tí chojni kixin ó ní yaoon tjejókoni sín ntá kjuèhe sín nkehe sine sín. Tjinkakónhya chrókuétuanhan sín sáchrókjui sín ntōe sín kixin nax̄a nehya sín la nt̄ia ó tsotienxín sín kjinta —ichro ch'án.

33 Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

34 Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niotja chontará? —ichro ch'án.

Ntá ntáchro sín kixin:

—Yato niotja chóntani la ko iso koche ntsíntsí —ichro sín.

35 Ntá ch'ín Jesús k'uetōan ch'án kixin kaín xín sín ts'ixitjaxin sín nonte, ichro ch'án.

36 Ntá kuákja ch'án tí yato niotja la ko tí koche ntsíntsí la kjuanchehe ch'án kjuasáyé Dios. Ntá kóchrít'ō ch'án tí niotja a la ntá k'uetuenhen ch'án tí sín k'uájiko ch'án kixin ts'óxíkayēhe sín tí niotja la ko tí koche kaín xín tí sín siín a, sine sín.

37 Na mé kaín xín sín kjóne sín na kókjehe sín ntá kjuenájín sín yato ntaxra tot'ō tí nkehe naxa tsíxehe.

38 A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a.

39 Ntá ch'ín Jesús mé nixjehe ch'án sín sákjuí sín la ntá k'uit'ótjen ch'án ntabárcō la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

1 A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxin sín ch'án la kjuanchehe sín ch'án

kíxin chrókjuakoxin ch'án ijnko kjuaxroan kíxin á chaxín jehe ch'án tsíkixin ch'án tí tjen Dios.

² A ntá ch'ín Jesús na kjuátehe ch'án, ntáchro ch'án kíxin:

—Jahará ntáchrórá kíxin ijie ntá kónjín ó tsi ijnko yaon jína kíxin kjátse nkajní.

³ La ntá nchítjen ntáchrórá kíxin ijie la náxrjónhya kíxin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhýará tí kjuaxroan sítónhen jie.

⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xíkaha ichro ch'ín Jesús.

Ntá kuítóhe ch'án sín la sákjuí ch'án.

Ch'ín Jesús ntáchro kíxin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'ín Jesús mé k'uatòye sín ntayaon la ntá k'uitjáyenhen sín tsíkjikohya sín niotja.

⁶ Ntá ntáchro ch'ín Jesús kíxin:

—Chrókóxakonhanrá kíxin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kíchó sín ntachro sín kíxin:

—Mé xíkaha ichro ch'án kíxin tsíkjikohyani niotja —ichro sín.

⁸ Ntá kónohe ch'ín Jesús kíxin nkehe tí kjo sín kíchó sín, ntá ntáchro ch'án kíxin:

—¿Nkekuènté tjórá kíxin chontahýará niotja? Jahará la intsíkoá tinkachónkirá tí janhan.

9 Jahará ¿á naxa tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

10 La ko ¿á xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájinrá tí nkehe tsíxehe?

11 A ntá ¿nkekuènté kixin kuiénxinhyará kixin jahan la jehya kuènte niotja tjenixja tió ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xikaha ichro ch'ín Jesús.

12 Na ntá kuienxín sín kixin nixjahya ch'án kuènte tí xroan t'ánkíxin niotja. Náhí. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo

(Mr. 8.27-30; Lc. 9.18-21)

13 Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

14 Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

15 Ntá ntáchro ch'ín Jesús kixin:

—¿A ntá jahará nkechorá kixin nkexro tí jahan? —ichro ch'án.

16 **A** ntá ch'ín Simón Pedro kjuátēhe ch'án ntá chro ch'án kixin:

—Jaha mé tí Cristo mé Xjeen Dios tjechón —ichro ch'án.

17 Ntá kjuátēhe ch'ín Jesús ntá chro ch'án kixin:

—Náxrjón tjen jaha Simón xjeen Jonás kixin ko-hya nijnko chojni kjuakōha tíha. Jehó T'aná tjen nkaya nkajní mé kjuakōha tíha.

18 Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sít'ána ninko la kjónté tí kjuachaxin kuènte kjuach'én la tsjachahya sinchek'itjáyan.

19 Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. **A** ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

20 Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

*Ch'ín Jesús chrónka ch'án kixin its'en ch'án
(Mr. 8.31—9.1; Lc. 9.22-27)*

21 Ntá ch'ín Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etōan kuènte ninko la tí sín nchat'á tjetōan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí níxin yaon mé tsoxechón ch'án ínaá.

22 Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án kíxin:

—Kjá Dios tsjanjonhya kjuachaxin xikaha tsonhan Ìnchéni kíxin jaha la xitjahya tsjasóte xikaha —ichro ch'ín Pedro.

23 A ntá ch'ín Jesús mé kuinkátjía ch'án la nixjehe ch'án tí ch'ín Pedro, ntáchro ch'án kíxin:

—Sátjia ntáha, Sátanas. Tjia téhya tí jaha tí nkehe tsonna. Jaha chrók'uínkakhén tí nkehe tjinkaon Dios. Jaha tjenkayáxinhya éxí tjinkaon Dios. Náhí. Tjenkayáxian éxí tjenkayáxin chojni ó —ichro ch'ín Jesús.

24 Ntá nixjehe ch'ín Jesús tí í so sín k'uájiko ch'án, ntáchro ch'án kíxin:

—Jnkojínrá tjinkáonrá tsochréhérá tí janhan la t'ichjánxin tsitohérá kaín tí nkehe tjaké asánrá, ntá tsámará tí ntacruz kuéntará, a ntá tsochréhérá tí janhan.

25 A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinçek'itjáyanxín asén kíxin tinkáchónki sín tí janhan la tsaá.

26 ¿A ntá nkehe tsonhen tí chrókjuacha ijnko chojni chróhónta kaín nkehe siín chjasintajni a ntá tí kjuachón chrókjuinçek'itjáyan? ¿Nkehe chrókjuenká chojni kíxin chróhónta tí kjuachón?

27 Tí Xjeen Dios K'óna Chojni tsikao ch'án tí kjuachaxin jíe kuènte It'é ch'án tjen nkaya nkajní la kaín tí sín ángel tsikao ch'án na ntá tsjenkehe ch'án jnkojnko chojni nkexrí tí xra kjuích'e jnkojnko tí jehe sín.

28 Chaxín xrjanka kíxin isorá tjejorá ntihi la naxa ts'énhyará naxa ts'ikonjiará kíxin nkexrí tí

kjuachaxin tsochón̄ta tí Xjeen Dios K'óna Chojni tí tsik̄ao ch'án̄ kjuachaxin̄ jié̄ —ichro ch'ín̄ Jesús.

17

*Ch'ín̄ Jesús mé̄ k'uixitóx̄in̄ nkexrí̄ tsjehe ch'án̄
(Mr. 9.2-13; Lc. 9.28-36)*

¹ Ntá̄ injón̄ yaon̄ chr'éx̄in̄ ntá̄ ch'ín̄ Jesús mé̄ sákjūiko ch'án̄ ch'ín̄ Pedro la ko ch'ín̄ Jacobo la ko ch'ín̄ Juan, kichó̄ ch'ín̄ Jacobo, la k'uit'ót̄jen̄ s̄in̄ ijnko jn̄a imá̄ noi.

² Ntá̄ ntiha tjejó̄ s̄in̄ ntá̄ xrín̄ahya k'uikon̄ s̄in̄ kixin̄ ch'ín̄ Jesús mé̄ k'uixitóx̄in̄ nkexrí̄ tsjehe ch'án̄. Tí̄ nkayakon̄ ch'án̄ la imá̄ tják̄inī tsjehe éx̄ī yaon̄ la ko iké̄ ch'án̄ la k'óna imá̄ tjóá̄ la tsjehe éx̄ī yóh̄ē ijnko xrohī t'inkaséyan.

³ Na ntá̄ xrín̄ahya k'uikon̄ s̄in̄ itjen̄ ch'ín̄ Moisés la ko tí̄ ch'ín̄ Elías tjejó̄tjō s̄in̄ tí̄ ch'ín̄ Jesús.

⁴ Na ntá̄ ch'ín̄ Pedro mé̄ ntáche ch'án̄ tí̄ ch'ín̄ Jesús kixin̄:

—Inchéni, jínā kixin̄ tjejó̄nī ntihi. Tí̄ tjinkávan̄ la chrókjuich'énanī iní̄ nchiā la mé̄ ijnko kuèntá̄ jaha la ijnko kuènte ch'ín̄ Moisés la í̄ jnko kuènte ch'ín̄ Elías —ichro ch'án̄.

⁵ Ntá̄ nax̄ā tjenixja ch'ín̄ Pedro na ntá̄ xrín̄ahya ikuī ijnko tjūī imá̄ t'inkaséyan̄ kjuák'etjā chrítaón̄ tí̄ jn̄ā tjejó̄ s̄in̄. Ntá̄ xrín̄ahya chríkjan̄ tí̄ tjūī kuín̄hin̄ s̄in̄ itén̄ ijnko nkexrō nixja na mé̄ ntáchrō kixin̄:

—Tí̄hi mé̄ xjanna. Imá̄ tjuah̄ā ch'án̄ la ko chànā kixin̄ itjen̄ ch'án̄. Chrókuinhín̄rá̄ tí̄ nkehē tjako ch'án̄ —ichro Dios.

⁶ Kuín̄hin̄ tí̄ s̄in̄ k'uájiko ch'án̄ xikahā la ntá̄ kjuítsínkā s̄in̄ nontē kixin̄ imá̄ chrakon̄ s̄in̄.

⁷ Na ntá ch'ín Jesús mé kóchjina tí tjejó sín la kuákóxín sín ch'án la ntáchro ch'án kixin:

—T'àyá chrakonhyará —ichro ch'án.

⁸ Na ntá xrinahya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxín sín tí jna ntá k'uetōan ch'ín Jesús, ntáchro ch'án kixin:

—Ninkexró chenkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹¹ Ntá kjuátēhe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe.

¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxí kóxrjínhín sín. Mé xíkaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xíkaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

Ch'ín Jesús mé kjuínchekitōhe jína ijnko xjan t'aniáte

(Mr. 9.14-29; Lc. 9.37-43)

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

15 — Ìnchéni, tikonóḡhéni kixin xjeenni la níhi, chónṭa ch'án chin t'aniáte. Nchónhya veces tjítsínkate ch'án xrohi la tjítsínkankí ch'án nṭa.

16 Nṭá kjuíkṭaoni ch'án ntihi la tí sín xrikoá la kjuachahya sín kjuínchekitoḡhe ch'án jína.

17 A nṭá kjuáteḡhe ch'ín Jesús ntáchro ch'án kixin:

— Jahará la chaxínhya tinkachónkirá tí janhan la imá tjásinrá jṡe. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méḡhe ntihi — ichro ch'án.

18 Nṭá ch'ín Jesús mé k'uḡtuēnhen ch'án tí nchṭakuen tí jínahya la nṭá k'uaxrjexín tí nchṭakuen tí jínahya tí chánjan la tuénxín kuítóḡhe xjan jína.

19 Nṭá kjuixin sákjuí sín la jehó ch'ín Jesús tjen ch'án la nṭá tí sín k'uájiko ch'án mé kjuanchankíhi sín ch'án, ntáchro sín kixin:

— ¿Nkekuènté kixin kjuachahyani kuakitsjeni tí nchṭakuen tí jínahya a? — ichro sín.

20 Nṭá ntáchro ch'ín Jesús kixin:

— Jahará la kjuachahyará kuakítsjerá nchṭakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la nṭá chróntácherá tí jnṭa kixin: “Sátjixian ntihi la sátsjia ókjé”, chróchorá chróntácherá tí jnṭa la nṭá tí jnṭa sáchrókjuixin ntiha. Mé xíkaha kaín nkeḡhe chrókjuachará chrókjuich'erá tí chaxín tinkachónkirá tí janhan.

21 A nṭá tí tsakítsjerá ijnko nchṭakuen tí jínahya la t'ichjánxin tsonixjehérá Dios la ko sintehyará.

*Ch'ín Jesús chrónka ch'án inaá kixin its'en ch'án
(Mr. 9.30-32; Lc. 9.43-45)*

22 Naḡa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etoan sinchekjasóte sín ch'án

23 la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenka ch'án tí nkehe kjuanchia tí sín kuènte n̄inko

24 Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènk̄i kuènte n̄inko mé sákjuítsjehe sín tí ch'ín Pedro la kjuanchankí sín kixin:

—Tí maestro kuéntá la, ¿a tjenkahya ch'án tí nkehe tjanchia tí sín nchekjènk̄i kuènte n̄inko? —ichro sín.

25 Ntá kjuátēhe ch'ín Pedro, ntáchro ch'án kixin:

—Kjá tjenka ch'án —ichro ch'án.

Ntá k'uíxenhén ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenka tí nkehe tjanchia tí sín t'etoan chjasintajni, á tí sín kuènte ntihó o á tí sín tsíkjix̄in ókjé? —ichro ch'ín Jesús.

26 Ntá kjuátēhe ch'ín Pedro, ntáchro ch'án kixin:

—Tí sín tsíkjix̄in ókjé mé tjenka sín —ichro ch'án. Ntá ntáchro ch'ín Jesús kixin:

—A ntá tí sín chjasén sín la t'ichjánx̄inhya chrókjuenka sín.

27 Kjánchó tjínk̄akonhya tsonínkaon ninkexró ntihi. La ntá sátsjia tí ntayaon sátsjikoá tí ichj̄on chóna gancho tséxin sín koche la ntaha itsé tí chj̄on

chrínki ntayaon. Ntá tsákjá tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásikehé sín jaha. Táha mé sájtjikoá tjènka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ **A** ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín

³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjára tí kjuachaxin kuènte Dios.

⁴ Tí jnkójín nkexro ts'óna éxí tí chánjan ihnkehya la mé antsí tjetooan ntiha.

⁵ **A** ntá tí nkexro ts'áyéhe ijnko chánjan kixin tinkáchónki sín tí janhan la mé xikaha éxí chrók'uáyéhe sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jina chrókjuincheteyá sín ch'án ijnko xro tsík'óna xrochre ntá chrókjuíkakánkí ch'án ntayaon ninka.

7 Imá náxrjónhya tjejó tí sín chjasintajni kixin síin nkehe tjasixín chojni jie. Xráxín la jehí síin, a ntá nòà tí nkexro tjasin tí nkehe tsjasixín chojni jie.

8 'Tí itjá o totá tjasixián jie na chrókójína chrókochrínjian chróchr'an ikjín kixin íchá jína chróchonta kjuachón kjónté it'óó itjá o it'óó totá. Á ntá tí yóí itjá o yóí totá chróchonta tsjasixián jie la tíha mé sátsjixián tí síche xrohi jnkochrín.

9 La ko kjaxin tí ikuan tjasixian jie na chrókójína chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjasixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyan

(Lc. 15.3-7)

10 'Chrókókjoniéhyará nijnko tí chánjan ntsíntsí. Tjonkará kixin nkaya nkajní la tí sín ángel kuènte tí xjanntsí la xráxín tjejó sín tí tjen T'aná nkaya nkajní.

11 Tí Xjeen Dios K'óna Chojni la mé ikui kixin chrókuinchekaá tí chojni xrichroe.

12 '¿Jahará nkechrórá? Ijnko chojni chóna ijnko ciento kolélo ntá chrók'uitjáyan ijnko va na ¿á chrókuítóehya ch'án tí noventa y nueve va tí jna ó a ntá á chrókuikjeyáhya ch'án tí ijnko tí ko k'uitjáyan ní?

13 A ntá tí tsjacha ch'án ts'itja ch'án va ntá antsí tsöchéhe ch'án kixin tí kolélo k'uitja ch'án la ntá kánhyó tsöchéhe ch'án kixin tjejó tí noventa y nueve ko tsík'itjáyanhya va.

14 Mé xikaha kjaxin It'eni tjen nkaya nkajní la tjinkakonhya ch'án kixin chrók'uitjáyan ninkexró kjónté ijnko chojni kánhyó tjetóan.

*Chrók'uitjáyanhanrá tí jię kjuasinhanrá kichuára
(Lc. 17.3)*

15 'Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jię kjuasin ch'án. A ntá tí kjuacha nixjehé tí kichuá la í kohya kjuanínkaon.

16 A ntá tí tahya ch'án kuentá nkechrua la ntá ntáche á jnko o yaá chojni sátjikoa kixin tsinhin sín á chaxín titekakonhya ch'án.

17 A ntá tí kjónté xikaha naxa titekakuenhya ch'án sín la ntá chenka tí sín tsíkójnkotsé nkehe tí jię kjuasin ch'án la ntá tí naxa titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjênki.

18 'Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

19 'Kjaxin ntáxrjan kixin tí tjejó yaará ntihi chjasintajni la tí jnkokoá tjejótjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án.

20 Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

21 Ntá kóchjina ch'ín Pedro mé kjuanchankí ch'án ntáchro ch'án kixin:

— Ìnchéni, ¿nkekjaín veces chrók'uitjáyenheni tí jie kjuasin kichó ni? ¿Á yato veces ó ní? — ichro ch'án.

22 Ntá kjuátehe ch'ín Jesús, ntáchro ch'án kixin:

— Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyenhya ch'án ijie kichó ch'án

23 Tí kjuachaxin kuènte Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra.

24 Ntá kjuankixin ch'án tsítsínkaxín cuenta la ntá xríñahya kóchjina ijnko ch'ín ch'e xra síká nchónhya millones chichaon.

25 Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetōan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuènte ch'án kixin ntá xikaha mé tsoxenka kaín tí síká ch'án.

26 A ntá tí nkexro ch'e xra mé kjuák'exín toch'in ch'án nkayakon tí rey la chrónóehē ch'án, ntáchro ch'án kixin: “Jaha Ìnchéni tikonóehēni la kjónté kjaxón tsjenkahani kaín tí síkähani”, ichro ch'án.

27 A ntá tí ch'ín rey kujkonóehē ch'án tí ch'ín a kjónté itsjé síká ch'án, ntá kuítóhe ch'án sákjuí.

28 A ntá tí sákjuí tí ch'ín a ntá xríñahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin:

“ǀTsjénkàna tí nkehe tjasíkàna ní ǀ náhí!” ichro ch'án.

²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóehē ch'án ntáchro ch'án kixin: “Tikonóehéni ijie la kjónté kjaxón tsjenkàhani kaín tí nkehe sikàhani”, ichro ch'án.

³⁰ A ntá jehe ch'án la kuikonóehya ch'án. K'uetōan ch'án kixin tí ch'ín a mé tsjak'echjina ch'án tsjixinjian tsjenkà ch'án kaín tí síká ch'án.

³¹ Ntá tí í so sín ch'exón xra mé k'uíkon sín la ntá imá kóxakonhen sín la sákuíchénga sín tí lámoé sín nkexrí kaá kónhen tí ch'ín síká.

³² A ntá tí lamo mé k'uetōan tsjik'íyehē sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyanhan tí nkehe tjasíkàna kixin jaha chronóana.

³³ A ntá jaha mé kjaxin chrókuikonóehé tí nkexro choxian éxí janhan kuikonóaha tí jaha”, ichro tí ch'ín lamo.

³⁴ A ntá imá kónínkaon tí lamo a la k'uetōan ch'án kixin tsjasóte tí ch'ín a tsjixinjian tsjenkà ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xíkaha T'aná tjen nkaya nkajní xíkaha sit'ahará jahará tí jehya kaín asánrá ts'itjáyanhanrá tí jiē chóna kichuára —ichro ch'ín Jesús.

19

*Tjako ch'ín Jesús kuènte tí sín t'itjíhi kichó
(Mr. 10.1-12; Lc. 16.18)*

¹ A ntá kjuixin nixja ch'ín Jesús kaín tíha, ntá sákjuíxin ch'án estado Galilea la kjuíji ch'án estado Judea nó tóhe tí ntario Jordán.

² Ntá nchónhya chojni kjuíjichréhe sín ch'án ntá ntiha mé kjuínchekitohe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á siín kjuachaxin tsjákehe jnkojín chojni ichjién kjónté kohya jie jíé? —mé xíkaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni siín chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”?*

⁵ La ko ntáchro kixin: “Mé xíkaha tí chojni ntoa la tsítóhe sín it'é sín la ko ìné sín la tsakja sín ichjién sín la yóí sín la éxí ó jnko chojni xíkaha ts'óna sín.”†

⁶ Mé xíkaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kixin kuákja kíchó sín, la i xitjahya ts'ítjíhi kíchó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetóan kixin ts'óna ijnko xroon tsakja tí ichjién kixin tsjákeexín kíchó sín?‡ —ichro tí sín fariseo.

⁸ Ntá ntáchro ch'ín Jesús kixin:

* **19:4** 19.4: Génesis 1.27; 5.2 † **19:5** Génesis 2.24 ‡ **19:7** Deuteronomio 24.1-4

—A ntá jahará titekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjéxín kichuára. Kjánchó tí xrankíxixín la xikahya kónhen.

⁹ Méxra ntáxrjan kixin jnkojín sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jie tíha. La ko kjaxin tí ijnko chojni chjin tsíkítsínkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín.

¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuích'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

*Ch'ín Jesús mé kjuíncheyaon ch'án chánjan
(Mr. 10.13-16; Lc. 18.15-17)*

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakonhen sín tí sín kjuikao tí xjan.

¹⁴ A ntá ntáchro ch'ín Jesús kixin:

—Nté t̄t̄ohérá tsoxrakoa xjan tí tjén janhan la t'ínkakuènyhará xjan ḱixin tí śin kuènte kjuachaxin nkaya nkajní la mé tóyóhẹ éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehẹ ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá injko ch'ín ntasoá sákjuítsjehe ch'án tí ch'ín Jesús la kjuanchankíhi ch'án ḱixin:

—Jaha la injko Maestro jína. La ntá ¿nkehe jína chrókjuich'eni ḱixin chróchóntani kjuachón jnkochŕixin? —ichro ch'án.

¹⁷ Ntá ch'ín Jesús kjuátẹhe ch'án, ntáchro ch'án ḱixin:

—¿Nkekuènté ntáchrua ḱixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochŕixin la títekávan tí nkehe k'uet̄oan Dios —ichro ch'ín Jesús.

¹⁸ Ntá ntáchro tí ch'ín ntasoá ḱixin:

—¿Nkehe tíha? —ichro ch'án.

Ntá ntáchro ch'ín Jesús ḱixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni

¹⁹ la ko chrókjuíkosáyehé it'á la ko ìná la ko chrótjuèhé ḱichuá éxí tjuèxian asán.[§] —mé xikaha ichro ch'ín Jesús.

²⁰ Ntá ntáchro tí ch'ín ntasoá ḱixin:

[§] **19:19** Éxodo 20.12-16; Deuteronomio 16.20; Levitico 19.18

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sijnchexiteyá la sátjia sijnchekjia kaín tí nkehe chonta la sijnchekjionhén tí sín nòa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhe sín tí kjuachaxin kuènte nkaya nkajní.

²⁴ Kjatée xrjanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

— Ìnchéni, jeheni kaín ni la kuítóhēni kaín nkehe chóntani kíxín tsochréheni tí jaha. A ntá ¿nkehe ts'áyéheni? — ichro ch'án.

²⁸ Ntá kjuátēhe ch'ín Jesús kíxín:

— Chaxín ntáxrjan kíxín tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochónta kjuachaxin jié la ntá kjaxinrá jahará chréhérá tí janhan la ts'ejorá teyó trono sinchekitoexínrá ijíé kaín tí sín tsík'axrjeníxín tí teyó xjeen ch'ín Israel.

²⁹ La ko kaín tí sín kuítóhe sín ntoe sín la ko kuítóhe sín tí kichó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kíxín tinkáchónki sín tí janhan, na ntá antsí má tsochónta sín la ko kjaxin tsochónta sín kjuachón jnkochrín.

³⁰ A ntá nchónhya tí sín t'etōan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etōan sín tí ntiha.

20

Ch'ín Jesús kjuíncheyóexin ch'án éxí tí sín ch'e xrā

¹ Tí kjuachaxin kuènte Dios la éxí yóhe ijnko chojni chóna xrā nontee ch'án la ntá ijnko yaon imá nchítjen sákjuíkjeyá ch'án chojni tsotjéhe ch'án to uva.

² Ntá tí k'uitja ch'án tí sín sich'ehe ch'án xrā ntá ikjo ch'án sín kíxín ijnko denario tsjenkehe ch'án sín tí xrā sich'e sín nontee ch'án tí yaon a.

³ Ntá chr'éxín como las nueve nchítjen ntá sákjuí ch'án ntsin la k'uíkon ch'án í so sín tjejó ntsin chóntahya sín xrā.

4 Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuich'erá xra nonteeni la jína chrókjuénkahará”, ichro ch'án. La ntá jehe sín sákjuí sín.

5 A ntá tí ìnché nonte la sákjuí ch'án inaá chonkixin naxa xík'itja ch'án í so sín ch'ehe ch'án xra la nta tí las tres kónjín la xikaha naxa xík'itja ch'án í so sín inaá.

6 A ntá las cinco kónjín sáxíkji ch'án nta sin inaá la k'uitja ch'án í so chojni ntaha chóntahya sín xra la ntá kjuanchankíhi ch'án sín kixin: “¿Nkekuènté tjejorá ntihi ch'ehyará xra kuenté yaon? —ichro ch'án.

7 Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xra nonteeni la jína chrókjuénkahará”, ichro ch'án.

8 A ntá ó kóntó ntá tí ìnché nonte mé nixjehe ch'án tí ch'ín t'etjan sítónhen xra nontee ch'án la ntáchro ch'án kixin: “T'iyehé kaín tí sín kjuich'e xra tjenkehé sín. Tjankíxian tjenkehé tí chojni kjuixixín k'uixenhen xra la chr'éxin tjenkehé tí sín saoxín k'uixenhen xra”, ichro ch'án.

9 A ntá kóchjina kaín tí sín k'uixenhen xra las cinco kónjín la jnkojnko sín k'uáyéhe sín jnkojnko denario.

10 Ntá chr'éxin, tió kóchjina tí sín k'uixenhen xra nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkojnko denario ó.

11 A ntá tí kjuachahya sín tjete ntá kjuankíxin sín kónínkakonhen sín tí ìnché nonte

12 la ntáchro sín kixin: “Tí sín ikui kjuixixín

la kjuích'e sín xra jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuích'eni xra kjónté sóa la kuenté yaon kjuích'eni xra”, ichro sín.

¹³ A ntá kjuátehe tí ìnché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahyará ninkehó. Ó kuítóexínni kixin ijnko denario tsjénkahará tí yaon.

¹⁴ Ntá tsákjá chichakoan la sátjia. Janhan tjínkavan tsjénkaha tí sín k'uixenhen kjuixixín éxí tí kjuénkaha jaha.

¹⁵ ¿Á chontahya janhan kjuachaxin xikaha chrókjuénkaha sín kixin tíha la chichakonna? ¿Nkekuènté tóchjinóxinhan jaha kixin xikaha kjuénkaha sín?” ichro ch'án.

¹⁶ Mé xikaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyaha kjánchó tsjéhya sín k'úitja —ichro ch'ín Jesús.

*Chrónka ch'ín Jesús ínaá kixin its'en ch'án
(Mr. 10.32-34; Lc. 18.31-34)*

¹⁷ Ntá ch'ín Jesús sákjuí ch'án ntia nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nch'at'á t'etöan la ko tí sín maestro tí tjako ley. Ntá jehe sín ts'etöan sín kixin its'en ch'án.

¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó

yaon níxin mé tsoxechón ch'án ínaá —mé xikaha chrónka ch'ín Jesús.

Tí nkehe kjuanchia tí ìné ch'ín Jacobo la ko ch'ín Juan

(Mr. 10.35-45)

²⁰ A ntá tí ìné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóehē tjan ch'án.

²¹ Ntá ch'ín Jesús kjuanchankíhi ch'án tjan kixin: —¿Nkehe tjinkávan? —ichro ch'án.

Ntá kjuátēhe tjan ntáchro tjan kixin:

—Tió tsétōanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátēhe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátēhe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjoyá ch'án ts'áyéhe tíha —ichro ch'ín Jesús.

24 Ntá kuínhin tí ite sín kixin xikaha tsíkjanchia tí sín a ntá kónínkakohenhén sín tí yaá a.

25 A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etōan chjasintajni la imá t'etūenhen sín kaín chojni la tí sín t'etōan imá nchehnkehe asén sín kixin ihyé sín t'etōan sín.

26 Kjánchó jahará la xikahya chrókjuich'erá. Náhí. Tí jnkójnra tjinkáonra chrókuétōanra la chrókjuínkítsará tí í so sín.

27 A ntá ti jnkójnra tjinkáonra chrókuétōanra mé t'ichjánxin senó chrókjuákoxinra chrókjuich'eherá kíchuára xra.

28 Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jína yaá chojni t'ikonhya (Mr. 10.46-52; Lc. 18.35-43)

29 Ntá k'uaxrjexín sín chjasin Jericó la nchónhya chojni chréhe tí ch'ín Jesús.

30 Ntá ntaha chrínta ntia tjejótjaxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankíxin t'íyehé sín ch'án ntáchro sín kixin:

—Inchéni, jaha tsík'axrjeníxian David, tikonóehéni —ichro sín.

31 Ntá nchónhya chojni mé ntáche sín tí sín t'ikonhya kixin:

—Táníra tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

— Ìnchéni, jaha tsík'axrjeníxian David, tìkonóehéni — ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ìkonhya la kjuanchankíhi ch'án sín ntáchro ch'án kixin:

— ¿Xá nkehe tí tjinkáonrá chrókjuít'ahará? — ichro ch'án.

³³ Ntá jehe sín kjuátehe sín ntáchro sín kixin:

— Jaha Ìnchéni, tjinkaonni chrókjuìnchek'ikuanni — ichro sín.

³⁴ Ntá ch'ín Jesús mé kuìkonóehé ch'án tí jehe sín la kjuìnchekuákóxìn tja ch'án tí ikon tí sín t'ìkonhya. Ntá tuénxín k'uìkon sín la chréhe sín tí ch'ín Jesús.

21

*K'uixenhen ch'ín Jesús chjasin Jerusalén
(Mr. 11.1-11; Lc. 19.28-40; Jn. 12.12-19)*

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnà Olivo. Ntá ch'ín Jesús k'uètuènhen ch'án iyó tí sín k'uájiko ch'án

² ntáchro ch'án kixin:

— Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehérá va ntá tsjíkuanará va ntihi.

³ A ntá tí jnkojín nkexro tsjanchankíhará nkekuèté tjasintankehérá va la ntá tsontáchrórá kixin “Ìnchéni t'ichjánxìnhin va la ntá tió tsjixin ntá tuénxín tsjikaáni va”, ichrorá — ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuèntará.

Ihnkehya ch'án la ijnko kolócho ó tjekjen ch'án,
mé ijnko kolóchóxjan, xjeen ijnko kolócho támá
nkehe.”*

Mé xikaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín
tí nkehe k'uetqan ch'ín Jesús.

⁷ Ntá kjuikao sín kolócho la ko xjeen va la kuak-
itsje sín ika titsáte sín ntá kjuínchekamá sín va ntá
kjuák'ekjen ch'ín Jesús.

⁸ Ntá itsjé chojni kuakitsje sín ka titsáte sín
na kjuentoá sín ka tinkák'ikjinxin sín ka tí ntja
ts'atsínkaxín ch'ín Jesús. La iso sín xraá kajni la ko
chaon nta yoa tsíkóchrínjin sín la tinkákjasin sín ntja
a.

⁹ Ntá iso sín tsítaón ntja la ko í so sín chréhe iton
ch'án mé kjuankixin sín itsje sín kixin:

—Tjancheheni kjuasáyé tí nkexro k'uaxrjenixin
tí rey David. Jína tí nkexro kjuixin kjuachaxién
ihnié Ìnchéni. Tjancheheni kjuasáyé Dios —ichro
sín itsje sín.

¹⁰ Ntá k'uixenhen ch'ín Jesús tí chjasin Jerusalén
la ntá kaín tí sín ntiha mé kóxakonhen sín la itsjé sín
kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín
kixin:

—Tíhi mé tí nkexro Jesús chrónka itén Dios
kjuixin ch'án chjasin Nazaret estado Galilea
—ichro sín.

* **21:5** Isaías 62.11; Zacarías 9.9

*Ch'ín Jesús kjuínchetjóá tí nínko
(Mr. 11.15-19; Lc. 19.45-48; Jn. 2.13-22)*

¹² A ntá ch'ín Jesús mé k'uíxenhén ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá.

¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntóna imé it'in nchia tsonixjanaxian sín.”
A ntá jahará tí nchia i tsíkji ch'énará itjueé xíchee†
—mé xíkaha ichro ch'ín Jesús.

¹⁴ Ntaha nkaxenhén nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína.

¹⁵ A ntá tí sín nchat'á tjetóan la ko tí sín maestro tjako tí ley mé k'uíkon sín kaín tí kjuaxroan kjuích'e ch'án la ko kuínhin sín kixin iso chánjan mé itsje sín nkaxenhén nínko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xíkaha ntá kónínkaon sín

¹⁶ la nixjehe sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkahi chro:

Jaha kjuánjuan kjuachaxin kixin tí sín chánjan hyé
la ko chánjan naxa tjejótakí
mé tsotsje sín‡

† 21:13 Isaías 56.7; Jeremías 7.11 ‡ 21:16 Salmo 8.2

—mé xikaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ok'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta.

¹⁹ Ntá k'uíkon ch'án itjen ijnko nta t'óna to higo chjino ntia. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xamá.

²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkekuèté kixin tí nta t'óna to higo tuénxín xamá? —ichro sín.

²¹ Ntá kjuátēhe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxín chrónixjeherá tí jna i kixin: “Sátjixian ntihi sátjíkjiānkíá ntayaon”, la mé xikaha tsonhen.

²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

23 Ntá kjuixin ntá ch'ín Jesús mé k'uíxenhen ch'án tí nínko ntiha. Ntá tíó tjetjako ch'án ntá kóchjina iso tí sín nchat'a t'etōan la ko tí sín táda judío t'etōan la kjuanchankíhi sín ch'án ntáchro sín kíxin:

—¿Nkehe tí kjuachaxin chonta kíxin xíkaha ch'e la ko nkexro tí kjuanjon kjuachaxin? —mé xíkaha kjuanchankí sín.

24 Ntá kjuátēhe ch'ín Jesús ntáchro ch'án kíxin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjét'a tí xra i.

25 ¿A ntá nkexro k'uetuēnhen ch'ín Juan kíxin tsíkite ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kíchó sín kíxin:

—A ntá tí tsontáchroni kíxin Dios tsík'etuēnhen tí ch'ín Juan ntá tsjanchankí tí ch'ín a kíxin nkekuèté kuítekakuenhyani ch'án.

26 A ntá tí tsontáchroni kíxin chojni ó tsík'etuēnhen ch'án la ntá chrakōnhenni tí chojni kíxin kaín sín kuítekaon sín kíxin ch'ín Juan la nixja ch'án itén Dios —ichro sín.

27 A ntá kjuátēhe sín ntáche sín tí ch'ín Jesús kíxin:

—Náhi, noehyani —ichro sín.

Ntá ntáchro ch'án kíxin:

—La ko kjaxin janhan tsōxrjankahya nkexro kjuanjon kjuachaxin kíxin tjét'a tí xra —ichro ch'án.

Ch'ín Jesús mé kjuíncheyóexin ch'án kíxin éxí yaá xjan

28 Ntá ntáchro ch'ín Jesús kíxin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nontēni”, ichro ch'án.

²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuíkjich'e ch'án tí xra a.

³⁰ A ntá tí it'é xjan a mé kjuínixjehe ch'án tí íjnko xjan la jnkokón k'uetuēhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uetuēhen it'é? —ichro ch'án.

Ntá kjuátehe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkj la ko tí chojni chjin ch'iyehē nchónhya chojni ntoa la saoxín ts'ixenhen sín tí kjuachaxin t'etōan Dios la ntá jahará la náhi.

³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkj la ko tí chojni chjin ch'iyehē nchónhya chojni ntoa mé kuítekaon sín. A ntá jahará kjónté xikaha k'uikonrá la kjuítoxiénhyará tí tjenkayáxinrá la ko kuítekákonhyará —ichro ch'ín Jesús.

Ch'ín Jesús kjuíncheyóexin ch'án kixin éxi chojni ch'e xra la jínahya asén sín

(Mr. 12.1-12; Lc. 20.9-19)

33 Ntá ch'ín Jesús ntáchro ch'án kixin:

—Tsinhínrá ijnko nkehe şintayóaxian. Éxí ijnko ch'ín k'uenkaxin ch'án itsjé ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòye kixin ts'énya sín înté to uva. La ko kjuích'éna ch'án ijnko tjat'õ noi kixin ts'it'ótjen ch'án tsotsjehe ch'án nkuíxín. §

'A nta kjuínchekjen ch'án tí nontee ch'án iso tí sín ch'e xr̄a ntá kjuixin ntá sákjuí ch'án imá ikjín.

34 A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xr̄a kixin tsjikjanchehe sín tí sín ch'e xr̄a nontee ch'án kixin tsjanjon sín tí nkehe tsakja ch'án.

35 A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixrõ k'uíchexín sín.

36 A ntá tí ìnché nonte a xíchr'án ch'án iso chojni ch'ehe ch'án xr̄a inaá, a ntá tí sín ch'e xr̄a la kjaxin xikahó kjuích'ehe sín tí sín kjuíji.

37 'A ntá xikaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchónthehe sín kjuasáyé tí xjeen ch'án, ichro ch'án.

38 A ntá tí k'uíkon tí sín ch'e xr̄a tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin ntá tsitokoni kaín tí nkehe kuènte ch'án”, ichro sín.

39 Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

40 Ntá kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí ìnché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátehe sín kixin:

—Mé tsjiji ch'án la tsikonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kixin:

—¿Á nunca kjuínchekuáxinhyará tí xroon itén Dios tsíkjin sín ósé? Mé ntáchro xikihi:

Tí xro náxrjónhya kuítóenta tí sín ch'éna tjat'ò, a ntá mé jie k'óna tí xro tjetóan.

Mé xikaha kjuích'e Ìnchéni Dios,

na ntá tíha mé ijnko nkehe kjuachrakon k'uíkonni.*
Mé xikaha ichro itén Dios.

⁴³ Ntá ntáchro ch'ín Jesús kixin:

—Tjonkará kixin Dios tsakitsjahará tí kjuachaxin kuènte ch'án la ntá sinchek'áyéhe ch'án tí sín ch'e xra jína.

⁴⁴ A ntá jnkojín nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchat'á tjetóan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín.

⁴⁶ La ntá tjinkaon sín chrókjuinçekjasóte sín ch'án kjánchó chrakonhen sín tí chojni kixin kaín

* 21:42 Salmo 118.22-23

sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexin éxí ijnko kia kótehe sín

¹ Ntá ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

² —Tí kjuachaxin kuènte Dios mé éxí yóhē ijnko ch'ín rey kjuasin ch'án ijnko kia kixin tsotehe xjeen ch'án.

³ K'uetuēnhen ch'án tí sín ch'ehe ch'án xra kixin tsjik'íyēhē sín tí sín kjueyá ch'án, kjánchó jehe sín mé tjinkakonhya sín tsochjina sín.

⁴ A ntá k'uetuēnhen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyaha kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanka la kaín nkehe la ó síchónhen. A ntá chróxrakoa sín tí síín kia”, mé xikaha k'uetoan ch'án.

⁵ A ntá tí sín tsík'íyēhē ch'án mé ántosén sín. Ijnko sín la sákjuí nontee la í jnko la sákjuí ch'án í jnko xra chóna ch'án.

⁶ La í so tí sín a mé tsítsé sín tí sín tsík'etuēnhen tí ch'ín rey la k'óka tí sín a hasta ik'uén tí jehe sín.

⁷ Ntá tí ch'ín rey mé kónínkaon ch'án ntá k'uetuēnhen ch'án tí sín soldado kixin its'en tí sín kjuàya la ko tsoche tí chjasén sín.

⁸ Ntá nixjehe ch'án tí sín ch'ehe ch'án xra inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyaha kuítekakonhya sín la kjuihya sín.

⁹ Méxra sátsjirá tí esquina tí ntia jié la t'iyeherá kaín tí sín tsoxetará kixin itsji sin ti kia”, ichro ch'án.

¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntia ntiha, mé chojni jína la ko chojni jínahya hasta k'uíxikaón chojni tí nchia ntiha.

¹¹ 'Ntá tí ch'ín rey mé kuitsjehe kaín tí sín tsík'íyehé ch'án la ntá k'uíkon ch'án ijnko ch'ín ntiha chóntahya ka jína kuènte tí kia a.

¹² La ntá nixjehe ch'án, ntáchro ch'án kixin: “Amigo, ¿nkexrí k'uíxenhén kixin tsík'ítsahya kuènte kié chojni tsotehe?” ichro ch'án. Ntá tí ch'ín a kjuátēehya ch'án ninkehó.

¹³ A ntá tí ch'ín rey mé k'uíyehé ch'án tí sín ch'ehe ch'án xra la ntáchro ch'án kixin: “Sínchenteto toté la ko itja tí ch'ín a la ité ntója sítié la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyahá la séhya sín k'uitja —mé xikaha kjuako ch'án Jesús.

Ch'ín Jesús ntáchro ch'án kixin ó nchoxon tsjenkehe sín gobierno

(Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxin sín tí ch'ín Jesús kixin ách'e ichrén jié tsjasin ch'án la ntá tsjanchia sín jié.

¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxin sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjàkua nt̄ie Dios, la ko jehya nkexrí tsjehe chojni tjenkayáxixián kixin á jína sín.

¹⁷ A ntá jaha chrónka nkehe tjenkayáxian. ¿Á jína chrókjuenkeheni tí gobierno romano o náhí? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxinráni?

¹⁹ Tjákónará tí chichaon tjenkehérá sín méhe —mé xikaha k'uetōan ch'ín Jesús.

Ntá kjuikohe sín ch'án tí chichaon a.

²⁰ Ntá k'uikon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkání tí chichaon méhe la ko nkexro ihnié chóna? —ichro ch'án.

²¹ Ntá kjuátēhe sín kixin:

—Tí ch'ín t'etōan mé tjenkání ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etōan tí nkehe kuènte ch'án la kjaxin tí nkehe kuènte Dios la chróchjehérá Dios —mé xikaha chro ch'ín Jesús.

²² Ntá tí kuínhin sín xikaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuáchaxin sín ch'ín Jesús. Ntáchro sín kixin:

24 —Maestro, tsíntáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxí xjeen tí ch'ín saó tsík'en.

25 Ntá ntihi k'uejó yato sín jnkokoá kichó sín. Ntá tí ch'ín saó kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo.

26 A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xikaha kónhen inaá. La kayatoé tí sín k'uéchónta sín tjan xikaha kónhen sín kaín sín ik'uén sín.

27 A ntá kjuixixín ntá kjaxin tjan ik'uén tjan.

28 Ntá tió tsoxechón kaín xín chojni tsík'en, ¿ntá nkexro ts'óna xìi tí jehe tjan kixin kayatoé sín kótehe tjan? —mé xikaha kjuanchankíhi sín tí ch'ín Jesús.

29 Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noah-yará nkehe chro xroon itén Dios la ko chonhyará tí kjuachaxin kuénte Dios.

30 A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxí tí sín ángel kuénte Dios ts'ejó sín nkaya nkajní.

31 A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xikihi chro ch'án:

32 “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i

* 22:32 Éxodo 3.6

la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetóan

(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuátēehya tí sín saduceo.

³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjetóan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”†

³⁸ Mé tíha mé tí ley imá tjetóan la ko saoxín k'uetóan Dios tíha.

³⁹ A ntá tí nkehe yóxin la tóyóhe la mé ntáchro xikihi: “Chrótjuèhérá kíchuará éxí tjuèxínrá asánrá.”‡

⁴⁰ Tí iyó nkehe i la mé antsí tjetóan kuènte tí ley tsík'etóan Moisés la ko tí nkehe kjuako tí sín k'uéchrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín

⁴² la ntá ch'ín Jesús mé kjuanchankí ch'án ntáchro ch'án kixin:

† 22:37 Deuteronomio 6.5 ‡ 22:39 Levítico 19.18

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan, tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétoan.”[§]

Mé xíkaha chro itén Dios.

⁴⁵ 'A ntá ¿xá nkexrí kixin Cristo chrók'óna xjeen David a ntá jehe ch'ín David kuíkítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés.

[§] 22:44 Salmo 110.1

³ Méxra chrókjuinchexiteyéhérá kaín tí nkehe t'etōan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkitsa sín tí nkehe imá ye yamá chojni.

⁵ Ich'e sín kaín xín nkehe kixin tsotsjehe chojni. Tóxrjínhín sín tsjak'enkání totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkání nkehe tjákini.

⁶ Tjinkaon sín tsochónta sín silla jína ts'ejóksen sín sine sín tió sátsji sín tí siín kia la ko xritjeyá sín tí silla antsí náxrjón chrók'uejóya sín nkaxenhen nínko.

⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsontáchro chojni kixin maestro tí jehe sín.

⁸ 'A ntá jahará la tjtóéhyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha.

⁹ La ntá chróntáchrohýará kixin ninkexró mé it'ará ntíhi chjasintajni kixin jahará la chontará jnkokoá It'ará mé itjen nkaya nkajní.

¹⁰ La ko jehe sín chróntáchrohýa sín kixin jefe tí jahará kixin jehó Cristo mé jefe.

¹¹ Tí nkexro antsí tsjinkitsa iso chojni la jehe ch'án mé antsí t'etōan ch'án.

¹² Kixin tí nkexro ntáchro kixin imá ijié la mé imá tsontsí. A ntá tí nkexro nchehnkehya la antsí tsojié.

13 'Nòará tí jahará maestro tjàkorá tí ley la ko tí jahará chojni fariseo. Jahará la jnkojínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuènte Dios kixin títóéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

14 'Nòará tí jahará maestro tjàkorá tí ley la ko chojni fariseo. Jnkojínxónhya tjenkayáxinrá. Jahará takitsjeherá ntøe tí chojni tsíkók'án la ntá isé nixjehérá Dios kixin ch'iyexínrá chojni kixin jína tí jahará. A ntá xikaha kjuich'erá jahará la antsí tsjasótiará.

15 'Nòará tí jahará maestro tjàkorá tí ley la ko chojni fariseo. Jahará la jnkojínxónhya tjenkayáxinrá. Jahará sátjirá nonte la chrítaón ntayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín antsí má tsjasótexín sín tí xrohi la kánhyó jahará.

16 'Nòará tí jahará kixin tétøanrá kjánchó ntakótánrá. Ntáchrórá kixin tí jnkojín chojni tsontáchro kixin sinchexiteyá sín nkehe la t'ákjenxin sín tí ninko la ntá t'ichjánxinhya sinchexiteyá sín. A ntá tí tsontáchro sín kixin sinchexiteyá sín nkehe la t'ákjenxin sín tí chica oro siín nkaxenhen ninko la ntá t'ichjánxin sinchexiteyá sín.

17 Imá løntirá la ko ntakótánrá. ¿Á imá tjetøan tí chica oro ø á imá tjetøan tí ninko kixin tí ninko mé kótjuáxin tí chica oro?

18 Kjaxin ntáchrórá kixin: “Tí jnkojín chojni tsontáchró sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontáchró sín kixin sinchexiteyá sín nkehe la t'ákjenxin sín tí nkehe tjokehé sín Dios chrítaón tí altar la ntá t'ichjánxin sinchexiteyá sín tí nkehe tsintáchró sín.”

19 Imá lontirá la ko ntakótánrá. ¿Á imá tjetóan tí nkehe tsochjehérá Dios o á imá tjetóan tí altar kixin tí altar mé tótjuáxin tí nkehe tsjánjonrá?

20 Kixin tí nkexro tsontáchró kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. Kjaxin t'ákjenxin ch'án kaín tí nkehe siín chrítaón ntiha.

21 A ntá tí nkexro tsontáchró kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhí. Kjaxin t'ákjenxin ch'án tí Dios itjen ntiha.

22 A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuènte Dios la ko tí nkexro tjet'etóan ntiha.

23 'Nòará jahará maestro tjàkorá ley la ko jahará chojni fariseo. Jahará jnkojínxónhya tjenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá tjetóan kuènte tí ley. Mé ntoá chrókjuenkayáxinrá la ko chrókuikonóehérá kíchuará la ko chrókuinkachónkirá Dios. Tíhi la antsí tjetóan chrókjuinchexiteyará la kjaxin chrókuítóehyará chrokujuich'erá tí í so nkehe.

24 Jahará la tétóanrá kjánchó ntakótánrá. Jahará la nchek'ankihirá kjónté ijnko kochjisen intsí

chón̄ta tí nkehe its'irá, a ntá ijnko kocamello kjónté
ijíé va la t'ínkará.

25 'Nòará tí jahará maestro tjàkorá ley la
ko jahará fariseorá. Jahará la jnkojínxónhya
tjenkayáxinrá. Jahará la imá nchetjóará chrítaón
tí vaso la ko tí plato, a ntá tí nkaxenhen tsíkaón
kjuachee la ko jahórá tjínkáonrá chróchontará itsjé
nkehe.

26 Jahará chojni fariseorá imá ntakótán jahará.
Saoxín chrókjuinchetjóará tí nkehe nkaxenhen tí
vaso la ko tí plato la ntá ó chrókótjóá tí chrítaón
kjáxin.

27 'Nòará jahará maestro tjàkorá tí ley la ko cho-
jni fariseorá. Jnkojínxónhya tjenkayáxinrá. Jahará
la éxí yóhe ijnko tòye tsíxravá chojni, imá náxrjón
tsjehe ntója, a ntá nkaxenhen mé tsíkaón huéseó
chojni tsík'en la ko kaín nkehe tjuáhya.

28 Mé xíkaha tí jahará la tsjehe éxí chojni jína
xíkaha, a ntá jnkojínxónhya tjenkayáxinrá la ko
jínahyará.

29 'Nòará tí jahará maestro tjàkorá ley la
ko chojni fariseorá. Jahará la jnkojínxónhya
tjenkayáxinrá. Jahará la kjuich'énará tjàt'ò náxrjón
chrítaón tí tòye tsíxravá tí sín k'uékjako itén Dios ósé
la ko nchek'ítsará tjàt'ò chrítaón tòye kuente tí sín
jína asén.

30 La ntá ntáchrórá kíxin tí chrók'uejorá tí k'uéjó
tí sín tsík'axrjeníxinrá la ntá chrókjuínkìtsahyará
chrók'uén tí sín kjuako itén Dios.

31 Méxra xíkaha jahórá ntáchrórá kíxin chaxín
tsík'axrjeníxinrá tí sín k'óyán tí sín k'uékjako itén
Dios.

32 Méxra ijie la tjinkáonrá tsjixinhanrá tí xra kjuích'e tí sín tsík'axrjeníxinrá.

33 'Jahará la tsík'axrjeníxinrá konche. ¿Ntá nkexrí chrókuaará kíxin itsi tí tsjasótiará?

34 Méxra janhan mé tsétuñhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhirá sín chjasin la chjasin.

35 Méxra jahará la yamará tí jie kíxin tí sín jína k'uíjixín ijnié senó. Méxra tsamará tí jie kíxin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, xjeen Berequías, tí nkexro k'oyánxinrá chjino tí altar.

36 Chaxín tjonkará kíxin kaín tí jie a mé yámá tí chojni siín ijie.

Tsjánka ch'ín Jesús
(Lc. 13.34-35)

37 Ntá ntáchro ch'ín Jesús kíxin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkítsará. Nchónhya veces tjínkavan chrókójnkotsérá la chrók'uáyakonhánrá éxí ijnko cochíká mé t'ayakonhen xjeen va chrínkí kanenee va mé xíkaha tjínkavan chrók'uáyakonhánrá tí jahará. Kjánchó jahará la tjinkákonhyará xíkaha.

38 Ntá jie la Dios la tsítóhe tí jahará.

39 Ntáxrjan kíxin í ts'ikonhyará tí janhan inaá tsjixrakájia tí yaon tsontáchrórá kíxin: “Imá jína tí nkexro kuixín kjuachaxién ihnié Ìnchéni” —mé xíkaha ichro ch'ín Jesús.

24

Chrónka ch'ín Jesús kixin ts'itjáyan tí nínko
(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a.

² A ntá ch'ín Jesús mé kjuátehe ch'án kixin:

—Jahará ¿á tjejotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjenhya kichó kixin kaín tíha la tsqxíka —ichro ch'án.

Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoexínni tió ts'inka tí jaha la ko nkexrí tsonoexínni tí itsi tí tsjixixín chjasintajni? —ichro sín.

⁴ Kjuátehe ch'ín Jesús kixin:

—Tóxakonhanrá titoéhyará kixin ninkexró chrókjuít'áyahará.

⁵ Nchónhya chojni itsi sich'iyaxín nina tsonáchro kixin: “Janhan mé tí Cristo” tsixro sín, la sich'ieyehe sín nchónhya chojni.

⁶ A ntá tió tsinhínrá tsonáchro chojni kixin ó siín kjuanínkaon la ko ts'ixin kjuachrakon kixin tsjanjonko kichó sín la kjónté xíkaha tsonhen

la chrakonhyará. Ó jehí tsonhen tíha tí naxa ts'itjáyanhya chjasintajni.

⁷ Ijnko nación tsjanjonko í jnko nación la tsjanjonxin sín tí xra ts'etoan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte.

⁸ Kaín tíha la ntá tsoxrankíxixón tí kjuatjoté tsonhen chojni.

⁹ 'A ntá tsotsérá chojni la tsjikaánrá sín tí tjejó tí síxreé kixin sinchekjasótiará sín la ntá ts'óyánrá sín. La ko kaín xin chojni siín chjasintajni tsonínkakonhanrá sín kixin tinkachónkirá tí janhan.

¹⁰ Ntá tí yaon a la itsjé sín la tsítóhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín.

¹¹ Ntá itsi nthónhya chojni ntoáhya tsjako la ntá sich'iyehé sín nthónhya chojni.

¹² La ts'ixin nthónhya jie jínahya la ntá ts'ixin itsjé chojni tsotjuèhya sín kichó sín.

¹³ 'A ntá tí nkexro naxa tjejó tinkáchónki tí janhan hasta tí tsjixixín la mé tsaá.

¹⁴ La ko tí itán jína chrónka nkexrí tjen tí kjuachaxin kuente Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyan chjasintajni.

¹⁵ 'Ch'ín Daniel k'uéchrónka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'ikonrá tíha. 'A ntá tí nkexro nchekuáxin mé tsienxin nkehe tíha.

¹⁶ Ntá kaín tí sín tjejó estado Judea tsochrìn sín jna sátsji sín.

* 24:15 Daniel 9.27

¹⁷ A ntá tí sín tjejó chrítaón nchia ntoé sín la í xitjahya tsakitsje sín ninkehó.

¹⁸ Ntá tí tjejóch'e sín xra nontee sín la kjá í tsokjanhya sín tsjikakja sín iké sín.

¹⁹ Ntá nòà tí chojni chjin tjejóyá sín la ko nòà tí sín nchekakí xjan tí yaon a.

²⁰ Chrókjuancheherá Dios kixin tí tsonhen tíha la chrókó Jehya nchakuen kin la ko chrókó Jehya tí yaon t'ok'éhe chojni.

²¹ Kixin tíha mé ijnko kjuachrakon imá ijié la desde tí xrankíxín chjasintajni la nunca xikahya kónhen.

²² Ntá tí chrók'ueṭoanhya Dios kixin tjoka ts'atsínka tíha ntá chrókuaáhya ninkexró. Ntá ts'etoan ch'án kixin tjoka ts'atsínka tí kjuachrakon jié kixin jehe ch'án mé imá tjuèhe ch'án tí sín tsíkjejá ch'án.

²³ 'Ntá tí tsontáchro chojni kixin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekákuénhyará sín.

²⁴ Kixin ntá itsi iso sín tsontáchro sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jié kixin tjinkaon sín chrókjuich'iyehé sín chojni kjónté tí sín tsíkjejá Dios.

²⁵ Ó xrjanca senó nkehe tsonhen kixin tsonohará.

²⁶ Méxra tí chróntáchro sín kixin: “Tsjeherá tí nteje ntiha tjen ch'án”, la ntá tsjihyará nó ntiha. O tí chróntáchro sín kixin: “Tsjeherá ntihi tí cuarto mé tjen ch'án”, la chrókuítekákonhyará.

²⁷ Méxra éxí tsjonkíxín la t'ikon chojni t'inkaséyanxín tí tjitoxin yaon hasta tsjiatóxin

yaon mé xikaha ts'ikon chojni tió itsi tí Xjeen Dios K'óna Chojni.

²⁸ Mé éxí yóhē tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ 'A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsinkí.

³⁰ La ntá ts'ikon chojni kixin nkajní tsixin tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsikao tí kjuachaxin jié.

³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueyá Dios tsjixin kanoé lado chjasintajni.

³² 'Chrók'uitjará nkexrí sintayóaxian kuènte ijnko nta to higo. Éxí yóhē tió chóna ntahnte la ko ts'ixin kayoa la nta tsoñoaxínrá kixin í séhya tsokjan ichrin.

³³ Mé xikaha tí ts'ikonrá ts'atsínka kaín tíha la ntá xikaha tsoñoaxínrá kixin í séhya itsi Ìnchéni.

³⁴ Ntá tjonkará chaxín kixin kaín tíha senó tsonhen tí naxa ts'enhya tí chojni siín jie.

³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteyá tíha.

³⁶ Á ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya

nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ 'Éxí yóhē tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni.

³⁸ Tí naxa titjiéhya sín ntá la kaín chojni la jína k'uéjósín la kjóne sín la ko ik'uísín la ko sítótehe sín kjuixrakájia tí yaon k'uíxenhēn ch'ín Noé ntabárcō.†

³⁹ A ntá jehe sín mé kienxínhya sín hasta kuijia tí k'uániá chrin ntá ikui ntá la k'uátjoá kaín sín. Mé xikaha tsonhen tió itsi tí Xjeen Dios K'óna Chojni.

⁴⁰ A ntá yaá chojni ntoa tjejóch'e sín xrā nonte la ntá ijnko la sátsji la í jnko la tsitóhe.

⁴¹ La ko yaá chojni chjin mé tjejót'o sín la ijnko la sátsji la í jnko la tsitóhe.

⁴² Chrók'uejotsjehérá kixin noahyará nkehora la ko nkesá ts'inka janhan.

⁴³ Chrókónohará tíhi: tí chrókónohe ijnko ìnché nchia nkehora tie chrókjui ijnko nkexro tsee la ntá chrókjuak'echónhen tí ìnché tí nchia ntá xitjahya ts'ixenhēn tí nkexro tjinkaon chrókueé.

⁴⁴ Méxra jahará la jína chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xrā la tí nkexro ch'ehya xrā jina

(Lc. 12.41-48)

⁴⁵ 'Tí nkexro chaxín ch'e xrā jína la ko imá nohe la ntá tí lámóé ch'án ts'etueñhen kixin ts'ayakonhen ch'án tí sín síin ntoe ch'án la ko tsjanjon ch'án nkehe sine sín chintii tí hora a.

† 24:38 Génesis 6.5-8

⁴⁶ Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uítuenhen ch'án.

⁴⁷ Chaxín tí lamo la tsjanjon ch'án kaín tí xra chóna ch'án ts'etōan tí ch'ín a.

⁴⁸ A ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámoe ch'án

⁴⁹ la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sítókoan.

⁵⁰ Ntá xrínahya tsokjan ti lamo ijnko yaon la ko ijnko hora noehya tí nkexro ch'e xra.

⁵¹ La ntá jehe ch'án la sinchekjasóte tí ch'ín kuítóhehe xra kjuínchexiteyáhya la ts'etōan ch'án kixin tsjasóte tí ch'ín a éxí tí sín jnkójínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuènte Dios mé éxí yóhe ite sín tjarisoá sátsji tí tsotehe chojni chuénko linterna tjiá aceite la sákjuíchónhen sín tí ch'ín tsíkótehe.

² In'ó sín la tsíkóyaxíenhya sín la in'ó sín ó tsíkóyaxínhin sín.

³ Tí sín tsíkóyaxíenhya na kjaxin la tsíkjjiko sin linterna kjánchó tsíkjjikohya sín aceite tsíkja ínaá.

⁴ A ntá tí sín tsíkóyaxínhin la sátsíkjiko sín xro tjiá aceite la ko tí linterna kuènte sín.

⁵ A ntá tí ch'ín tsíkótehe la tjokahya kui ch'án la ntá jehe sín mé tsíkíhi sín kotáchrín la tsík'ejójua sín kaín sín.

⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án.

⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín.

⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsí aceite kuéntará kixin ó k'uànkā aceite tjáá linternéni”, ichro sín.

⁹ A ntá tí sín tsíkóyaxínhin mé ntáchro sín kixin: “Náhi, tí aceite tí xikaha tsjanjonni intsí jahará la antsí jeheni la tsjachahya. Íchá jína sáttjik'ènará tí sítóxin ntiha”, ichro sín.

¹⁰ Ntá tí in'ó tí sín kóyaxíenhya mé sákjuik'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuiko sín ch'án tí kia tsíkótehe sín la ntá ó tuénxín k'uikjéhe tí puerta.

¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.”

¹² A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'an.

¹³ Ntá ntáchro ch'ín Jesús inaá kixin:

—Méxrā xikaha tí jahará chrók'uejótshéhérá kixin noahyará nkeyaon la nkehora itsi ti Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehē ch'án tí sín ch'ehe ch'án xra la ntá chjēhe ch'án sín tí chichaon a kixin ts'ayakonhen sín.

15 'Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án ikjín.

16 Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil.

17 Kjaxin tí nkexro k'uáyéhe iyó mil chichaon mé xíkjacha ch'án í jnko iyó mil.

18 A ntá tí nkexro k'uáyéhe ijnko mil chichaon mé sákjuí ch'án la kjuích'éna ch'án ijnko tōyē kjuavá ch'án tí chichaon kuènte lámōē ch'án.

19 A ntá nchónhya nánó k'uátsínka la ntá ikjan tí lámōē sín kixin ntá tsjentoáko sín ch'án cuenta.

20 Saoxín kui tí nkexro k'uáyéhe tí in'ó mil la chjēhe ch'án tí lamo í jnko in'ó mil la ntá chro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon i”, ichro ch'án.

21 Ntá tí lamo mé ntá chro kixin: “Nchoxon tí xíkaha. Jaha la ijnko chojni jína ch'e xra. La ó kjuinchexiteyá jína. Kjónté jehya xra jié la kjuinchexiteyá jína la ntá tsotjaha ijnko xra antsí jié la tjak'e tsochéheni.”

22 Ntá chr'éxin ikui tí nkexro k'uáyéhe iyó mil la ntá chro ch'án kixin: “Jaha mé chjehéni iyó mil la

kjuachani í jnko iyó. Tákjá tjinhin tí chichaon í”, ichro ch'án.

²³ La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuinchexiteyá. Kjónté jehya xra jié la kjuinchexiteyá jína la ntá tsotjaha í jnko xra antsí jié. Tjak'e tsochéheni”, ichro ch'án.

²⁴ A ntá ikui tí ch'ín k'uáyéhe ijnko mil la ntáchro ch'án kixin: “Ó nòna kixin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya.

²⁵ Méxra chrakonni la sákjuikjak'emáni tí chichaon chrínkí nche. Tákjá chichakoan tjinhin”, ichro ch'án.

²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaá tí nkehe k'uénkahya.

²⁷ A ntá tí chichaon chróchr'an banco. Ntiha chrókuich'exín xra ntá tí ikjan janhan ntá chrók'uayáha antsí itsjé chichaon chrókuacha kichó chica”, ichro tí lamo.

²⁸ A ntá nixjehe ch'án tí í so sín tjejó la ntáchro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon

²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chóntahya la kjónté tí intsí chóna la ts'axrjehe.

³⁰ A ntá tí nkexro ch'ehya xra la tsétuénhén sátsji ch'án tí sítie ntója la ntá ntiha la tsotsjánka ch'án la ko sinetaón ch'án neno ch'án.”

Tsitoxín ijié chojni chjasintajni

31 'A ntá tí tsi tí Xjeen Dios K'óna Chojni la tsikao ch'án kjuachaxién jié éxí ijnko Réy la ko tsikao ch'án kaín xín tí sín ángel ntá ntaha tsjak'etjaxin ch'án tí trono ts'etqanxín tí kjuachaxién jié.

32 Ntiha kaín xín tí chojni tsíkji_{xin} nkuíxín naci_{ón} tsochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí kotentso la ókjé ts'ixin.

33 Méxra ts'etqan ch'án kíxín tí kolélo la ts'ixin nó tja ch'án chjina, a ntá tí kotentso la nó ti tja ch'án kjon.

34 Ntá tí Rey tsonixjehe tí sín tjejó tja ch'án chjina tsontáchro kíxín: “Xrákirá jahará ti tjen kjuachaxin kuènte T'aná kíxín T'aná ó kjuíncheyaonrá ch'án. Tí naxa kjuích'énahya Dios chjasintajni la xráxín kjuenkayáxin ch'án xikaha tsonhen.

35 Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxí ijnko chojni kjuixin ikjín la jahará kjuánjonrá nketí k'ok'àna.

36 La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántsjeherá ti janhan, la kjuak'échjina la ntá jahará kjuasántsjeherá tí janhan.”

37 A ntá tí sín jína la tsjanchankí sín kíxín: “Ínchéni, ¿nkesá k'uíkonni kíxín ik'uén kjinta ntá kjuanjonni nkehe kjónte? ¿La nkesá k'uíkonni kíxín ik'uén ntá la kjuanjonni nkehe ik'uia?

38 ¿La ko nkesá k'uíkonni kíxín ikjín kjuíxian ntá kjuanjonni nketí k'ok'áha? ¿La ko nkesá k'uíkonni kíxín chontahya iká la kjuanjonni ika k'uítsa?

39 ¿La nkesá k'uíkonní kixin kóniha o kjuák'echjina la ntá kjuújitsjeheni tí jaha?" mé xikaha tsjanchankíhi sín ch'án.

40 A ntá tí Rey tsontáchro kixin: "Tió kjuínkĩtsará ijnko kichó ni kjónté ijnko chojni nòé la mé yóhe kixin tí janhan chrókjuínkĩtsará."

41 'A ntá tí Rey t'etoan mé tsonixjehe tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuènte ch'án.

42 Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uia.

43 K'uájia éxí ijnko nkexro kjuixín kjín la jahará kjuánjonhyará nketí k'ók'àna la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan."

44 Ntá tí jehe sín la tsjanchankí sín kixin: "Inchéni, ¿nkesá k'uíkonní kixin ik'uén kjinta la ik'uén ntá la ko kjuíxian kjín la ko chontahya iká la ko níha la ko kjuák'echjina? ¿Mé nkesá k'uíkonní xikaha la ntá kjuínkĩtsahyani tí jaha?" tsixro sín.

45 La ntá tí Rey tsjatehe ch'án tsontáchro ch'án kixin: "Tí xikaha kaín tíha kjuínkĩtsahyará ijnko chojni imá nòé la éxí xikaha kjuínkĩtsahyará tí janhan."

46 A ntá tí sín jínahya xikaha kjuích'e la mé sátsjixin sín ntihi tsjasóte sín jnkochrín. A ntá tí sín jína la sátsji sín ts'áyéhe sín kjuachón jnkochrín —mé xikaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án

(Mr. 14.1-2; Lc. 22.1-2; Jn. 11.45-53)

¹ Ntá kjuixin chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjayan iyó yaon ntá tsjasin sín tí kia pascua la ntá tí Xjeen Díos K'óna Chojni mé tsotsé sín ch'án tsjikaán sín ch'án tí tjejó tí sín t'etōan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nchāt'á t'etōan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntāsin kuènte tí nchia kjuák'e ch'ín Caifás tí ch'ín nchāt'á t'etōan.

⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án.

⁵ A ntá ntáchro sín kixin:

—Tí síin kia la chrótséhyani ch'án kixin imá tsonínkaon tí chojni —ichro sín.

Ijnko tjan kjuikao aceite xraxé kuikite tjan ikja ch'ín Jesús

(Mr. 14.3-9; Jn. 12.1-8)

⁶ Ch'ín Jesús tjen chjasin Betania ntōe ch'ín Simón tí ch'ín k'uéchóna chinlepra.

⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuíkaón aceite xraxé náxrjón la imá tjeje k'uíte. A ntá tí tjene ch'ín Jesús ntá tí tjan a mé kuikite aceite ikja ch'án.

⁸ A ntá tí sín k'uájiko ch'ín Jesús mé k'uíkon sín xikaha ntá kónínkaon sín la ntáchro sín kixin:

—¿Nkekuènté kóxénhen tí xrōan a?

⁹ Íchá jína chrókóxīxin itsjé chichaon tí xrōan ntá tí chichaon a chrókjuinkĩtsa tí sín nòé a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuích'e tjan.

¹¹ Tí sín nòé la ó xráxín ts'ejókoará sín, a ntá janhan la jnkochrínhaya ts'ejóni.

¹² Tí nkehe kjuích'e tjan mé kjuíncheka tjan aceite xraxé tí cuerpo kuèntana la mé xikaha kjuakoxin tjan kixin xikaha tsoxravána.

¹³ Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehē ch'án tí sín nchāt'á t'etōan

¹⁵ la ntáchro ch'án kixin:

—¿Nkekjaín tsochjìnará tsoxrjanka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchāt'á t'etōan kjuenkehe sín ch'án treinta chichaon plata.

¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

17 Ntá ikui tí yaon xrankíxixín kia sine sín nioṭja tsíkjikohya tí xroan t'ánkíxin nioṭja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kíxin:

—ǀnchéni, nketí tjinkávan sincheyaxíxinni tí sineni tí kia pascua? —ichro sín.

18 Ntá ntáchro ch'án kíxin:

—Sátsjirá Jerusalén la tsjasánrá ntøe ijnko ch'ín la nixjehérá ch'án tsontáchrórá kíxin: “Ntáchro Maestro kuènténi kíxin í séhya naxa tsjak'e ch'án la ntá ijie ntøa ntihi tsoyaxíxin kíxin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

19 A ntá tí sín k'uájiko ch'ín Jesús mé kjuínchexiteyá sín la kjuíncheyaxíxin sín ntiha tí nkehe sine sín kia pascua.

20 Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín.

21 La ntá tió naxa tjejóne sín la ntáchro ch'ín Jesús kíxin:

—Chaxín tjonkará kíxin jnkojínrá tjejorá ntihi mé sinchekjirána —ichro ch'án.

22 Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kíxin:

—ǀnchéni, zá jeheni ní? —ichro sín.

23 Ntá kjuátøhe ch'ín Jesús kíxin:

—Tí nkexro tsochr'ánkíkian nioṭja tí plato a mé tí nkexro a mé sinchekjina ch'án.

24 Tí Xjeen Dios K'óna Chojni xikaha tsjasóte ch'án éxí nixja xroon itén Dios, a ntá nõa tí ch'ín

sinchekji ch'án. Íchá jína chrókokjéhya ch'án —mé xikaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xikaha tsíntáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'ò ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuèntana —ichro ch'án.

²⁷ Na ntá kuákja ch'án ijnko vaso tjiá ìnté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá

²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kixin ts'íjmáxin ijíé sín.

²⁹ Tjonkará kixin ts'íhya janhan tí ìnté to uva ínaá tsjixrakájia tí yaon ts'ayàjia kjuachaxin kuènte T'aná ntá xík'ini ìnté to uva ínaá —mé xikaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjui sín tí jnà Olivo.

³¹ Ntá ntáchro ch'ín Jesús kixin:

—Jahará tsítōnaráni kaín rá ijie tie ḱixin ntáchro tí xroon itén Dios ḱixin: “Its'en tí nkexro Pastor t'ayakonhen kolélo ntá kaín tí ko mé tsjichroe va.”*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátēhe ch'ín Pedro ntáchro ch'án ḱixin: —Kjonté kaín sín tsítóha sín ntá janhan la náhi —ichro ch'án.

³⁴ Ntá ntáchro ch'ín Jesús ḱixin: —Chaxín tsoxrjanka ḱixin tí tie i naxa tsotsjehya kochíntōa la ó s̄inchemána níya —ichro ch'án.

³⁵ Ntá ntáchro ch'ín Pedro ḱixin: —Kjonté koína its'én la s̄intamáhya tí jaha —ichro ch'án.

La ntá kaín tí sín k'uájiko ch'án na xikaha ichro sín kaín sín.

Ch'ín Jesús chrónóghē ch'án It'é ch'án tí tjen ch'án tí Huerto Getsemaní
(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án ḱixin:

—Tjejorá ntihó ntá janhan sátsjia tsonixjaha T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuanḱixin kóxakonhen ch'án la ko k'uává ch'án.

³⁸ Ntá ntáche ch'án tí iy'á sín ḱixin: —Imá t'avá asenná éxi its'én ntá ts'axrje asenná. Ntá jahará ntihó tsitōhará ts'ejotsjehekoárána —ichro ch'án.

* 26:31 Zacarías 13.7

39 Ntá sákjuí ch'án antsí kǐn̄x̄in ntá kjuák'exín toh'in ch'án k'uísén ch'án hasta caxin kja ch'án nonte ntá chrónóehē ch'án It'é ch'án tjen nkaya nkajní, ntáchro ch'án kǐxin:

—It'éni, tí tjinkávan chrókjuinchekaáni kǐxin chrók'uihyani tí nkehe tsjá tjiá tí copa i. Kjánchó jehya éxí tjinkaonni jeheni. Náhí. Éxí tjinkávan jaha —ichro ch'án.

40 Ntá ikjan ch'án tí kuítóhe sín la ó k'uíkon ch'án kǐxin tjejóua sín. Ntá nixjehē ch'án tí ch'ín Pedro ntáchro ch'án kǐxin:

—Xá xitjahya chrók'uejósjehekoarána ijnko hora.

41 Titohará tjejotsjehérá la nixjehérá Dios kǐxin tsjinkǐtsará ch'án kǐxin chrókjuachroehyará ch'ín Tsohren. Asánrá tóxrjín̄h̄in kjánchó tí cuerpo chontará la imá ntá —mé xikaha ichro ch'ín Jesús.

42 Ntá sákjuí ch'án yóxin ínaá chrónóehē ch'án It'é ch'án, ntáchro ch'án kǐxin:

—Jaha It'éni tí xitjahya tsjakjíyan tí nkehe tsjasótexínni la ntá tjinkaonni éxí jaha tjinkávan —mé xikaha ichro ch'án.

43 Ntá ikjan ch'án la k'uíkon ch'án tjejóua tí sín k'uájiko ch'án ínaá kǐxin tjiehya sín kotáchrin.

44 Ntá kuítóhe ch'án sín ínaá la níxin sáxíkji ch'án ntá ó xikahó xínixja ch'án ínaá.

45 Ntá kjan ch'án tí k'uéjó sín la ntáchro ch'án kǐxin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chón̄ta jie tsjikaán sín ch'án.

46 Ntá ijie t'inkatjenrá sátsjini ḱixin ó kjui tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntqechiso

(Mr. 14.43-50; Lc. 22.47-53; Jn. 18.2-11)

47 Ntá naxa tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etqan la ko tí sín táda kuènte tí sín judío mé kui sín.

48 Ntá ch'ín Judas, tí ch'ín kjuínchekji, mé tsíntáchro ch'án ḱixin:

—Tí ch'ín tsakihá tueen ch'án na mé tsonoaxínrá ḱixin jehe ch'án. Ntá itserá ch'án —mé xikaha tsíntáchro ch'ín Judas.

49 Ntá kóchjinehe ch'án tí ch'ín Jesús la nixjehe ch'án ntáchro ch'án ḱixin:

—¿Á jína tjen, Maestro? —ichro ch'án.

Ntá kjóneko ch'án kochíto.

50 Ntá kjuátqhe ch'ín Jesús, ntáchro ch'án ḱixin:

—Amigo, á ó k'uinka tí xra tjinkávan sich'e?

Ntá xikaha kaín sín kóchjinehe sín ch'án la itsé sín ch'án.

51 Ntá ijnko ch'ín k'uájiko ch'ín Jesús mé kuak-itsje ch'án chica espada kóchrínjin ch'án tatsjon ijnko tí sín ch'ehe tí nchat'á t'etqan xra.

52 Ntá ntáchro ch'ín Jesús ḱixin:

—Chr'axenhén tqe chica espada méhe. Kaínxín tí sín tjà yaxín chica espada la xikaha ts'enxín sín.

53 ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

54 Kjánchó tí xikaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

55 Ntá ch'ín Jesús mé ntáche ch'án tí sín ikui kixin: —Jahará k'uinkakoará chica espada la ko inta kixin tsotserána éxí chrótserá ijnko síchee xikaha. A ntá kaín yaon kjuak'é nkaxenhen nínko kjuàkua ¿na ntá nkexrí ntiha mé tsexinhyarána?

56 Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuitohe sín ch'án, ntá sákjuí sín.

Ch'ín Jesús kóchjina ch'án tí síxregé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

57 Ntá tí sín itsé ch'ín Jesús la sákjuíko sín ch'án ntoe ch'ín Caifás, tí nchat'á t'etoan. Ntaha mé tsíkójkotsé kaín tí sín maestro tjako tí ley la ko tí sín t'etoan kuènte nínko.

58 Ntá ch'ín Pedro ikjín tinkáchréhe ch'án ntá kjuíji ch'án tí ntasin ntoe tí nchat'á t'etoan la kjaxin k'uixenhen ch'án tí ntasin la kjuák'eko ch'án tí sín policía kuènte nínko kixin tsotsjehe ch'án nkerí tsonhen.

59 Ntá tí sín nchat'á t'etoan la ko tí sín táda la ko kaín tí sín t'etoan mé kjueyá sín nkexrí ts'eka sín jie tí ch'ín Jesús kixin jina chrók'óyán sín ch'án.

⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín

⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké ínaá”† —mé xíkaha chro sín.

⁶² Ntá tí nchát'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté tjátééhya ninkehó? ¿Á chaxín xíkaha tsíntáchrúa éxí xíkaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchát'á t'etoan kixin:

—Kjuachaxién ihnié tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchro ch'án kixin:

—Éxí tí ntáchrúa jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuí mé tsixin ch'án nkaya nkajní —ichro ch'ín Jesús.

⁶⁵ Ntá kuínhin tí nchát'á t'etoan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xíkaha nixja ch'án. Méxra t'ichjánxinhya í so chojni tsochrónka. La ntá jahará la ó kuinhínrá kixin nkexrí nixja ch'án.

⁶⁶ ¿A ntá jahará la, ¿nkechorá? —mé ichro tí nchát'á a.

† 26:61 Juan 2.19

Ntá kjuátēhe sín ntáchro sín kixin:

—Chón̄ta ch'án̄ j̄ie la chrók'uen ch'án̄ —ichro sín.

⁶⁷ Ntá iso sín la kuik̄ite sín ntate sín nkayakon ch'án̄ na í so sín na kjuate sín ch'án̄ la í so la chjéhe sín ikon ch'án̄.

⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án̄ kixin chón̄hya ch'án̄ tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro nax̄a tjetjaxin ch'án̄ tí ntasin la ntá ikui ijnko tjan ch'e x̄ra ntiha kóchjinehe ch'án̄, la ntáchro tjan kixin:

—Kjaxian xríkoa tí ch'ín Jesús tsík̄jix̄in estado Galilea —ichro tjan.

⁷⁰ A ntá ch'ín Pedro kjuínchemá ch'án̄ nkayakon kaín sín la ntáchro ch'án̄ kixin:

—Nonahya nkehe tí ntáchrua —ichro ch'án̄.

⁷¹ Ntá sákjuí ch'án̄ kjuíji ch'án̄ chjina tí puerta. La ntá í jnko tjan k'uikon tí jehe ch'án̄ la nixjēhe tjan kaín sín tjejontaxin, la ntáchro tjan kixin:

—Tí ch'ín i la kjaxin k'uájiko ch'án̄ tí ch'ín Jesús tsík̄jix̄in chjasin Nazaret —ichro tjan.

⁷² Ntá ch'ín Pedro kjuínchemá ch'án̄ inaá, k'uákjenx̄in ch'án̄ ihnié Dios, ntáchro ch'án̄ kixin:

—Chonhya tí nkexro a —ichro ch'án̄.

⁷³ Ntá ant̄sí chr'éx̄in tí sín k'uéjontaxin kóchjinehe sín ch'ín Pedro la ntáchro sín kixin:

—Chaxín jaha kjaxin jnkojín tí sín a kixin tjátsoanx̄inni tí nixja jaha —ichro sín.

⁷⁴ Ntá k'uákjenx̄in ch'án̄ ihnié Dios ntáchro ch'án̄ kixin:

—Chonhya tí nkexro a —ichro ch'án.

Na ntá xrínahya itsje kochíntõa.

⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxã tsotsjehya kochíntõa mé ó tsjixin s̃inchemána níya kixin chonhyana.”‡ Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uínkaséyan ntá kaín sín nchaṭ'á t'et̃oan la ko tí sín t'et̃oan kuènte tí sín judío kjuenkayáxin sín nkexrí ts'óyán sín tí ch'ín Jesús.

² Ntá tjechronteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinčekji ch'ín Jesús, mé k'uikon ch'án kixin ts'óyán sín tí ch'ín Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchaṭ'á t'et̃oan la ko tí sín táda.

⁴ La ntá ntáchro ch'án kixin:

—Ó kjuasinni jie kixin kjuínčekjini ijnko nkexro tjóá —ichro ch'án.

Ã ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

‡ 26:75 Mateo 26.34

⁵ Ntá ch'ín Judas mé sákjuík'e tí chichaon nkax-enhen n̄inko ntá sákjuí ch'án kjuísik'á isin ch'án nta.

⁶ Ntá tí sín nchat'á t'et̄oan kjuenájín sín tí chichaon la ntáchro sín kixin:

—Tí chichaon la kóxix̄in ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochón̄ta sín nketí tsoxravá tí chojni tsík̄jix̄in ikjín.

⁸ Mé x̄ikaha kjuínchek'in sín tí nonte mé Campo Kuènte Jn̄i la hasta ijie la nax̄a x̄ikaha nchek'in sín.

⁹ Mé x̄ikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'ín a),

¹⁰ la k'uet̄enaxín sín tí nonte kuènte tí ch'ín ch'éna nchésen kixin x̄ikaha kjuínchexiteyá sín tí nkehe k'uet̄uanna Ìnchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuíko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuát̄he ch'ín Jesús, ntáchro ch'án kixin:

—Éxí ntáchrua jaha —ichro ch'án.

* **27:10** Zacarias 11.12-13

12 Na ntá tí sín nchat'á t'etoan la ko tí sín táda t'etoan t'eka sín jie tí ch'ín Jesús kjánchó la ch'ín Jesús la ninkehó kjuátēehya.

13 A ntá ch'ín Pilato kjuanchankí ch'án kixin:

—¿Á kiénhya kaín tí jie t'eka sín tí jaha? —ichro ch'án.

14 Kjánchó ch'ín Jesús la ninkehó kjuátēehya ch'án. Ntá tí ch'ín gobernador la chrakon ch'án.

K'uetōan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

15 A ntá tí kié pascua mé kuènhen tí ch'ín gobernador kixin jnkojnko nánó takitsjexín ch'án ntōechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji.

16 Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás.

17 Ntá itsjé chojni kójnkotsé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

18 Kixin tí ch'ín Pilato la ó nohe ch'án kixin kjuachjinoxínhin chóna tí sín kjuíkaán tí ch'ín Jesús.

19 Ntá jehe ch'án naxa tjetjaxin ch'án tí nchek-itōexixin ch'án ijié chojni la ntá tí ichjién ch'án mé k'uetuēnhen tjan ijnko chojni tsjichénka ch'án kixin tsjiatéhya ch'án tí nkexro jína kixin kóntó náxrjónhya k'uíkonxín tjan kotáchrién tjan kixin tí jehe ch'án.

20 A ntá tí sín nchat'á t'etoan la ko tí sín táda t'etoan a mé nixjehe kaín tí chojni tsikóchjina kixin

chrókjuanchia sín kixin chrókuítóhe ch'án tí ch'ín Barrabás sáchrókjui, a ntá ch'ín Jesús mé chrók'uen.

²¹ A ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

—¿A ntá nkehe sít'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsí má itsen k'uixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxinhin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xrakao sín ìnta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámáhya jie tí its'en tí nkexro í chóntahya jie. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kixin:

—Jeheni la ko xjeenni mé yámáni tí jie tí its'en tí nkexro i —ichro sín.

²⁶ Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'uetōan ch'án kixin

tsjate sín tí ch'ín Jesús la ntá kjuínchek'áyéhe ch'án tí sín tsjak'enkani sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án.

²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié.

²⁹ La kjuak'enkaya sín kja ch'án ijnko corona tsíkjich'éna sín ntach'i la ko kjuanjon sín ijnko nta vara kíxin tjenkáya tja ch'án chjina. La ntá k'uéjóxin toch'in sín nkayakon ch'án la kjuanoá sín ch'án, ntáchro sín kíxin:

—Jnkochríxín tsjak'é tsétuēnhén tí sín judío —ichro sín.

³⁰ La ko kjaxin ntaté sín kuikite sín nkayakon ch'án la ko kuákja sín tí nta tjexraá ch'án la t'íchjéxin sín kja ch'án.

³¹ Ntá kjuixin kjuanoá sín ch'án na ntá kuakit-sjehe sín ch'án tí ka kjátse tié ntá kjuínchek'inkáya sín tí iké ch'án xráxín. Ntá sákjuíko sín ch'án kíxin tsjak'enkani sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuixín ch'án chjasin Cirene, mé it'in ch'án Simón. Ntá k'uētuēnhen sín ch'án kíxin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en.

34 Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

35 A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xikaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”†

36 Ntá tí sín soldado ntaha k'uéjóna sín t'ayakonhen sín ch'án.

37 Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuēnhen tí sín judío.”

38 Kjaxin yaá tí síchee k'uéjónyáni sín ntacruz ijnko la nó tja chjina la í jnko la nó tja kjon.

39 Ntá tí sín tinkák'atsínka mé kjuanoá sín ch'án tinkátjía kja sín

40 la ntáchro sín kixin:

—Jaha ntáchrúa kixin chrók'oxíka tí n̄nko a ntá iní koá yaon la ó chrókjuixin chrókjuich'éna inaá,‡ ichrúa. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxián tí ntacruz méhe —ichro sín.

41 La ntá kjaxin tí sín nchat'á t'etōan la ko tí sín maestro tjako tí ley la ko tí sín fariseo la ko tí sín k'uetōan kuènte n̄nko kjuanoá sín ch'án, ikjo sín kíchó sín kixin:

42 —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó

† 27:35 Salmo 22.18 ‡ 27:40 Juan 2.19

ch'án chrókjuinkajinxin ch'án asén ch'án tí ntacruz kixin ntá kjaxinni chrókuitekaonni tí jehe ch'án.

⁴³ Jehe ch'án tsintáchro ch'án kixin Dios tjinkjtsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxinhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjín mé k'uíxin tie chjasintajni.

⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'éni, It'éni, ¿nkekuènté kujtohéni?§ —mé xikaha ichro ch'án.

⁴⁷ Ntá iso sín tjejontaxín kuínhin sín ntá ntáchro sín kixin:

—Tí ch'ín a mé t'íyehę tí ch'ín profeta Elías —ichro sín.

⁴⁸ Ntá ijnko ch'ín kuinká ch'án sákjuikakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrìn ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté títóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án inaá, ntá kjuixin ik'uén ch'án.

⁵¹ Mé ntá tuénxín k'uíchje tí ka tjenkákúènxín nkaxenhen nínko. Mé k'uíchje tí ka k'óna yaá tí

§ 27:46 Salmo 22.1

kjuankíxixín noi hasta nonte. La ko kuínki nonte la ko tí tjo la kjaxin xitjehe.

⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios.

⁵³ Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uíxenhen sín tí chjasin tjóá mé chjasin Jerusalén la ntaha itsjé chojni k'uíkon kixin xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínki nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehé sín k'uékinkáchréhe sín ch'ín Jesús tí kjuixin ch'án estado Galilea kixin mé ntiha kjuankíxixín sín k'uékjinkítsa sín ch'án.

⁵⁶ Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xravá ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehé ch'án kjaxin k'uéchréhe ch'án tí ch'ín Jesús.

⁵⁸ Ntá tí ch'ín José sákjuítsjehe ch'án ch'ín Pilato kjuíkjanchia ch'án tí cuérpoé tí nkexro Jesús. Ntá ch'ín Pilato mé kjuanjón ch'án kjuachaxin.

⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá.

⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjich'éna ch'án. Ntá ijnko

xro jíe k'uíkjàxín ch'án tí ntója tí tjo, ntá kjuixin ntá sákjuí ch'án.

⁶¹ Ntaha kjuák'e tí tjan María Magdalena la ko í jnko tjan María tjejójtj_xín sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nch_{at}'á t'et_oan la ko tí sín fariseo sákjuítsjehe sín tí ch'ín Pilato

⁶³ la ntá ntáchro sín kixin:

—Ó xraxinkaonni kixin tió nax_a kjuák'echón tí nkexro kjuích'ia la tsíntáchro ch'án kixin ts'atsínka ín_i yaon ntá tsoxechón ch'án inaá, tsíchro ch'án.

⁶⁴ Méxra tsétu_enhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhí, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'èx_in tsoché_nka sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankíx_ixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jína tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítóhe sín tí sín soldado ntahó kixin ts'ayakonhen sín.

28

*Ó xechón ch'ín Jesús**(Mr. 16.1-8; Lc. 24.1-12; Jn. 20.1-10)*

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkji_xravá Jesús.

² Ntá xrína_hya kuínkí nonte imá tji_an kíxin ijnko ángel kuènte Ìnchéni k'uínkajín_xin nkaya nkajní la kjuíji ch'án tí tsí_xravá Jesús la kjuakji_in ch'án tí xro a tje_kjèxin tòye la ntá chrítaón tí xro a kjuák'ekjen ch'án.

³ Tí ángel la imá tjákini tsjehe éxí ijnko xrohi la tí iké ch'án la imá tjóá tsjehe éxí chrinta.

⁴ Tí sín soldado mé k'uíkon sín xikaha la ntá sí_xrànka sín chrakon sín la éxí tsík'en sín xikaha k'uéjó sín.

⁵ La ntá tí ángel mé ntáche ch'án tí chojni chjin kíxin:

—Chrakonhyará. Janhan ó nòna kíxin xritjéyará tí nkexro Jesús mé tí nkexro tsíkjak'enkání ntacruz.

⁶ Kjánchó í kohya ch'án ntihi ó tsí_xechón ch'án inaá éxí chrónka ch'án senó. Xrákirá tsjehé_rá tí tsíkjak'e sín ch'án, í kohya ch'án.

⁷ Ntá sátjirá tjoka tjíchenkará tí sín k'uájiko ch'án kíxin: “Tí nkexro la ó tsí_xechón. Ó kuítónxin ch'án ntia sátsji ch'án estado Galilea. Ntiha ts'íkonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuí_xin sín tí tsí_xravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xrínahya titàya k'uúkuèn sín kixin itjen tí ch'ín Jesús la nixjehé sín ch'án. Ntá kóchjinehe sín ch'án la kjóa sín tóté ch'án, kuítekaon sín ch'án.

¹⁰ La ntáchro ch'án kixin:

—Chrakonhyará sátjirá tjíchenkará tí sín kichó ni kixin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchət'á t'etəon kaín tí nkehe tsíkónhen tí k'uéjó sín ntiha.

¹² Ntá tí sín nchət'a t'etəon kjuínixjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado.

¹³ La ntáchro sín kixin:

—Chronkará kixin tí tie naxaxə tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án, ichrorá.

¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchət'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxí k'uítuenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uətuənen ch'án tí sín k'uék'ajiko ch'án tí xra sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etōan ch'ín Jesús.

¹⁷ Ntá k'uíkon sín ch'ín Jesús la ntá kuinkáchónki sín ch'án kjónté iso sín naxa kjuenkayáxin á chaxín jehe ch'án o náhí.

¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni.

¹⁹ Méxra sátjirá kaín xín nación la tjácohérá chojni kixin tsitekaon sín tí janhan. Tíkítexínrá sín kjuachaxién ihnié It'éni la ko ihnié tí Xjeen la ko Nchakuèn Dios.

²⁰ Tjácohérá sín kixin sinchexiteyá sín kaín xín nkehe kuétuanhanrá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b